

BIBLIOTHECA PRIVATA  
PRAEP. GEN. SOC. IESU

BIBL. SCRIPTORUM

98 E 5

INFERNUS APERTUS  
HOMINIBUS CHRISTIANIS,

*ut*

in illum non descendant.

*SIVE*

CONSIDERATIONES

*de*

Pœnis Infernalibus,

propositæ

& per totius hebdomadæ dies  
distributæ, Italico Sermone

*à quodam*

Patre Societatis JESU.

Latine redditæ

*à*

P. MAXIMILIANO RASSLER.

Ejusdem Societatis

D. D. Sodalibus Academicis

B.V.M. Annuntiatae Moishem

in strenam

RECUSÆ ET OBLATÆ.


ANNO M. DCCXVII.

---

ARGENTORATI,

Typis viduæ MICHAELIS STORCKII,

Universit. Argent. Catholic. Typogr.





17405

Descendant in  
Infernum viventes  
ne descendant mo-  
rientes.

*S. Bernardus ad FF. de  
monte Dei.*

*Sum ex Libris francisci  
antonii Sarboucher. -*  
*J. B. 3.*



## *Interpres Lectori.*

**P**AUCIS te volo , mi Lector ,  
quia multis non possum. Ne-  
gat manus officium , dum mens  
attonita hæret seriâ æstimatione  
eorum quæ scripsit. O Pecca-  
tum ! ô Infernus ! O æternitas !  
Credit quòd sint ista Mundus  
Christianus : quid tamen verè  
sint ista , nescit , quia non perpen-  
dit , Mundus Christianus. Si se-  
riò perpenderet , si rectè nôsset ,  
quàm mox alius à se evaderet !  
Utinam hanc ego efficere muta-  
tionem possem , & claudere os  
illud post tantam jam multitu-  
dinem devoratum insatiabile !



Fortassis aliquid eam ad rem præfens libellus conferet : eâ certè mente latinè à me est reditus. Ejúsne Author sit, qui reliquorum hoc volumine operum, P. Paulus Segneri, dicere non ausim. Sic fama ferebat : sed inter Opera hujus Authoris Parmæ duobus tomis edita subinde illum non reperi. Ejus certè spiritu scriptus est, & si non ab ipso, à P. Petro tamen Pinamontio, Socio Missionum ejus individuo, nisi vehementer fallor, in lucem datus. Lege tu illum, relege, verba ejus singula, singulos apices perdende : spondeo, nil oberit : non rediget, quod nonnulli metuunt, ad insaniam; nisi fortè sanctam illam, quæ Sapientia est apud DEUM. O quàm præstat hæc

legendo non peccare, quàm negligendo æternùm, ô æternùm! perire. An operæ non est, tantillâ molestiâ redimere calamitatem, quâ nulla nec tempore diuturnior, nec doloribus acerbior, nec omni ex parte intolerabilior potest excogitari? Descende ergo, descende Lector, te ipso melior rediturus; ne non descendendo descendas æternùm non exiturus.



PRÆNOBILI,

*Clarissimo & Consultissimo*

*Viro ac Domino,*

D. FRANC. JOSEPHO  
GEIGER,

*Juris utriusque*

DOCTORI,  
SATRAPÆ

*in*

Wasselenheim, Marlenheim &  
Wangen,

Congregationis Mariano-  
Academicæ

P. T.

PRÆFECTO.



NON exhorresces Vir Cla-  
rissime, & Consultissi-  
me, quod Tibi inscribi-  
mus opusculum de in-  
ferorum æstuarijs differens. Non

eum Gehenna terret, quem vera  
in Deum fiducia, & tranquilla  
conscientia solatur & erigit. No-  
tior est nobis eximia tua pietas,  
integritas vite, quam cum fama  
publica in Te suspicimus, & vene-  
ramur, quàm ut suspicari nobis li-  
ceat Te hisce posse concuti. Par-  
cemus hìc modestiæ, ac submissio-  
ni tuæ, quam omnium mentium  
tabulis inscriptam habes: sed quì  
poterimus tenebris involvere, quod  
in pleno lucet meridie? tacere ne-  
fas est, ubi omnis lingua tuas vir-  
tutes loquitur. Et muti has prædi-  
cant Arcis Wasselenhemensis la-  
pides. Hanc subingressis in primo  
etiam limine Virtus Tua obvia  
non forensam Curiam, sed omni-  
genæ religionis, virtutumq; om-  
nium Arcem esse monet, ac mores

*proin componere. Spectamus &  
absente Te in piissimis prolibus  
virtutum Tuarum etypom: audi-  
mus & tacente Te, quàm sanctus  
continuo tuus cum illis sermo. Non  
saeculo, sed sacratis Deo Religioni-  
bus genuisse has iure dixerimus.  
Filiorum alterum triumphanti in  
Caelis non sine magna sanctitatis  
fama demortuum jam adscripsisti  
Societati JESU: Filiae quinq; in sa-  
cro Deo à Te dedicata Parihenone  
Sponso suo vivunt sanctius &  
securius, sextâ in amplexus cele-  
stis Sponsi translata. Sed privata  
haec sunt & domestica. Publica si  
inspicimus, vela contrahimus, ca-  
lamum ponimus, & locum damus  
Alsatiæ nostræ metropoli Argen-  
tinæ, & triplicis Satrapiae tuæ  
subditis. Gloriatur illa sibi congra-*



*tulans justo adeò ac sapiente Mi-  
nistro Te ac Satrapa: non desinunt  
hi magno suo cum solatio prædica-  
re ubivis non tam Satrapæ, quàm  
amantissimi Patris sui genuinum  
amorem, pervigiles curas, prom-  
ptum omnibus semper subveniendi  
studium, justitiæ tenorem, miseri-  
cordiæ viscera, suaves non minus  
quàm graves mores: seq̃ ex solo  
hoc felices existimant, quod Tibi  
subesse à calo sibi concessum sit.*

*Novimus & quàm vigilanter  
cum vate Regio annos æternos in  
mente habeas, quàmq; seriâ, san-  
ctaq; consideratione in repetita sæ-  
pius sacra ascesi inferni incendia  
inspexeris.*

*Accedit quod scriptio de severa  
Dei in reprobos justitia nemini ad-  
scribatur rectius, quàm amanti*

*justitiam, quàm quo administra-  
res aliquando sanctius, tantum in  
jurisprudencia posuisti studij, ut  
supremam ex ea Doctoratûs re-  
tuleris Lauream: Eamq; maximo  
cum emolumento boni publici in  
antiquissima Friburgensi Brisgoæ  
Universitate annis pluribus pro-  
fessus fueris. Cui cum tremendi  
Divini Numinis in perduelles fu-  
roris tacitis semper cogitationibus  
contemplationem Te conjungere  
omnes noverint, nemo est qui  
metuat, ne in tuo Tribunali aut  
causâ cadat, si justa est, aut gratia  
vim equi habeat, aut culpa redi-  
matur auro.*

*Viden itaq; Vir Clarissime, &  
Consultissime quo jure tibi inscri-  
bamus opusculum de tam terribili  
tractans materia. Dignare tuâ*

*illud virtutum luce, & fama circumdare, ac tenebricosum illum inferiorum carcerem exemplo tuo nobis illuminare, ut eum penitiùs tecum contemplantes evadamus in æternum. Vale. Datum Molsheimj Calendis Januarijs, Anno M. DCCXVII.*

**Prænobili, Nobili, Clarissimæ  
& Consultissimæ**

**Dominationi Tuæ**

**devoti**

**Confœderati Mariani.**

THE UNIVERSITY OF CHICAGO  
LIBRARY  
540 EAST 57TH STREET  
CHICAGO, ILL. 60637  
U.S.A.  
1962

THE UNIVERSITY OF CHICAGO  
LIBRARY  
540 EAST 57TH STREET  
CHICAGO, ILL. 60637  
U.S.A.  
1962

THE UNIVERSITY OF CHICAGO  
LIBRARY  
540 EAST 57TH STREET  
CHICAGO, ILL. 60637  
U.S.A.  
1962

THE UNIVERSITY OF CHICAGO  
LIBRARY  
540 EAST 57TH STREET  
CHICAGO, ILL. 60637  
U.S.A.  
1962



## Introductio.

**I**nconsideratio , & Ignorantia, tam vultûs lineamentis inter se similes sunt, ut nonnunquam una sumatur pro alia. *Inconsideratio & ignorantia equiparantur.* Axiomatis locum apud Legisperitos obtinet. Quin ipsæ adeò Sacræ Literæ utrique eodem effectus tribuunt. Hinc illa ruina, quæ apud Jobum adscribitur Inscitiæ: *Quia nullus intelligit, in æternum peribunt;* apud Jeremiam à Spiritu Sancto adscribitur defectui considerationis, & diligentis cogitationis: *Desolatione desolata est omnis terra, quia nullus est qui recogitet corde.* 12. 1. Mirum igitur non est, si Peccatores, etsi Fides illos doceat, esse Infernum pro iis qui pec-



cant, peccent nihilominus perinde ac si hoc nescirent; non enim cogitant. Obstupescebat enimverò Præsul Salvianus, nec capere poterat: *Quid causæ est, ut, si quispiam Christianus futura credit, futura non timeat? Si credit quæ dixit DEUS, non timeat, quæ minatur DEUS? lib. 5. de Eccles. Cath.* Magnum prodigium, ait ipse, credere æternitatem suppliciorum destinatam Iniquis, & quiescere tranquillè in iniquitate: habere pro certo quod DEUS dixit, & non timere illud, quod DEUS minatus est. Sed en causam à S. Ambrosio manifestatam: *Nihil timent, quia nihil vident.* Peccatores non timent, etsi credant; quia oculos clausos habent attentæ considerationi rerum futurarum, & eos unicè defigunt in res præsentis: unde faciunt sicut aspides, quæ oculos habent in temporibus; licet enim videant id, quod circa ipsos est, non vident tamen id, quod est ante ipsos, & eos expectat. *Nihil timent, quia nihil vident.* Aliàs quomodo fieri posset, ut

ut cū sit Infernus in Mundo, in Mundo essent Peccatores? Ingens incendium absumit omne contagium. *Memorare novissima tua, & in æternum non peccabis. Eccl.*

Hinc quæ ars melior claudendi abyssum pœnarum Mortuis, quàm aperire illam considerationi Vivorum? S. Catharina Senensis excessu quodam Zeli desiderabat posse se collocare magno suo impendio ad os Inferni, & illud obturare, ne ulla ampliùs Animarum à dilecto Sponso suo redemptarum in illum incideret. Ego qui tanto Zelo non ardeo, cuperem saltem opponere parvulum hunc Libellum, rogando ex intimo animi sensu DEUM, ut tantum illi virtutis tribuat, ut uni saltem alicui possit claudere immensam illam voraginem, quæ nunquam satiatur devorando. *Infernus dilatavit os suum, & aperuit os suum absq; ullo termino. Isa. 5.* Et quia unus ille, quem ego præ aliis omnibus lucrari desidero, tu es, mi Lector, tibi no-

mine Animæ tuæ, usque adeò oblivioni à te traditæ, ego hæc folia offero, obtestans, ut tantillum quotidie mane temporis invenire cures, quo & legas, & veritates istas tuo commodo penetres. Divisi illum in tot Considerationes, quàm multi sunt hebdomadæ dies; & harum quamlibet divisi in tria puncta, ut distinctio tibi auferat tædium, & ordo afferat claritatem.

Non credo interim, quòd unquam subire animum possit cogitatio, his in pagellis locum esse posse exaggerationi: si tamen unquam suspicio ejusmodi animum pulsaret, memineras, pœnas alterius vitæ supra naturam esse, adeoque nec comprehendi, nec explicari posse à nostra mente, & à nostra lingua: & sicut non est oculus, qui unquam viderit, aut auris, quæ unquam audiverit, aut cor, quod unquam conceperit aliquid simile illi gloriæ, quam Deus præparavit servientibus sibi; sic nec est oculus, nec auris, nec animus, qui

qui ita sibi repræsentare possit pœnas, ut sunt, quas DEUS paratas habet iis, qui ipsum injuriâ affecerint; cùm per hos magna & divina videri debeat ejus Justitia in supplicio, sicut magna videtur ejusdem Misericordia in præmio. *Altitudinem cœli, & profundum abyssi, quis dimensus est. Eccl. i.* Bona & Mala vitæ futuræ excedunt omnem mensuram præsentis conditionis, & non minùs de eorum intensione, quàm de eorum duratione, quidquid dicatur, infinities semper minus est illo quod re ipsa est. *Quidquid vis dicas de eternitate, quia quidquid dixeris, minus dicis. S. Aug. in Psal. 60.*

Potiùs igitur, quàm locum des tam stultæ persuasioni, quâ res hîc repræsentatas vero majores existimes, conare concipere illum timorem, qui solus nos potest reddere securos, quia *qui pavet, cavet; qui negligit, in ea incidit*; ut in hanc rem loquitur Sanctus Bernardus *Serm. ad Cleric. c. 4.* Et ad illum dignè concipien-



cipiendum ante omnia paucis te commenda divino Spiritui, Virgini Sanctissimæ, & Custodi tuo Angelo: subinde stude aliquanto temporis spatio singulari animi applicatione considerare, & sensim ponderare omnia, non superficietenus duntaxat eadem attingere: siquidem illa fitula, quæ in undas non immergitur, non impletur. Quodsi interdum aut malus Dæmon aliquâ suggestione, aut Socius aliquis Dæmone pejor pravâ invitatione, & exemplo te aggredietur, oppone illi scuti instar veritatem manè consideratam, confestim illam revocando in memoriam. Magna illa cogitatio, quæ, si Augustino fides, Ecclesiæ tot Martyres, tot Eremiti inquilinos, tot Virgines, tot Pœnitentes dedit, non sufficiet ad dandum tibi tantum virium ut contemnas momentum voluptatis ad evitandam æternitatem dolorum? Spero, si remedia alia tantarum virium non fuerunt, ut quantum opus erat, te juvarent, te isto



isto adjutum iri : id enim nî fiat, aliud isto efficacius parare haud scirem. *Quod non sanat medicamentum, sanat ferrum ; quod ferrum non sanat, sanat ignis, quod non sanat ignis, est insanabile.*

Tandem quia Oratio est medium princeps, quo Divina Providentia ad nobis benefaciendum utitur ; idcirco ad obtinendam istam gratiam summi prorsus momenti, evitandi damnationem æternam, assignatur pro singulis diebus certa quædam precum formula, quæ serviat ad implendum per ipsam monitum à Christo JESU Servatore nobis relictum in isto negotio. *Vigilate, omni tempore orantes, ut digni habeamini fugere ista omnia, & stare ante filium hominis. Luc. 21.* Attende tibi semper, aperiendo oculos sollicitâ consideratione, ut sis dignus fugere tantum malum, quantum est, damnari æternum ; & frui tanto bono, quantum est, æternum esse beatum.

# Consideratio I.

Pro die Dominica.

## CARCER INFERNI.

*Augustia.*

### I.

**C**onsidera , primam injuriam ,  
quam DEO infert Anima, esse,  
quòd abutatur libertate sibi conces-  
sa, violando in DEI oculis præcepta  
sibi lata, & protestando factis ipsis,  
quod nolit servire DEO suo: *Dixisti,*  
*non serviam. Jer. 2.* Hinc ad punien-  
dam & vindicandam temeritatem  
tam detestabilem, fabricatus est ipse  
DEUS carcerem aliquem subterra-  
neum in imo Universi loco, ubi par-  
erat eum constitui, ut quàm longis-  
simè abesset à cœlo. Ibi quamvis  
ipse locus satîs amplus sit, damnati  
tamen non habebunt vel illud solat-  
ium, ac laxamentum, quo fruitur  
aut miser aliquis captivus, suos in-  
tra

tra muros obambulando; aut misellus æger, suo in lecto se ex uno in aliud latus obvertendo. Siquidem congregabuntur in congregatione unius fascis in lacum, & claudentur ibi in carcere. Isa. 24. v. 22. Hærebunt ibi compacti in unum fascem, & unus alteri impositus cumulati tanquam victimæ infelices: & hoc tam propter multitudinem damnatorum, quibus angusta fiet ingens ceteroquin illa fossa; quàm multo magis propter ipsum ignem, qui ipsis pro compedibus erit & catenis: *Pluet super peccatores laqueos: ignis, & sulphur, & spiritus procellarum pars calicis eorum.* Psal. 10. Et præter ista DEUS non concurret cum ipsis ad ullum motum, qui sit vel tantillo refrigerio; cùm nullam ampliùs eorum rationem habeat, perinde ac si jam in Mundo non essent. *Obliviscatur ejus misericordia.* Job 24. v. 21. Hinc miseri illi non constricti tantùm erunt, sed etiam immobiles, & idcirco si Beatorum aliquis (ut Anselmus ait in libro Similitudinum) tanti erit

roboris, ut, si res posceret, totam loco movere terram posset; Reprobis vicissim quilibet tam erit debilis, ut ne dimovere quidem possit ab oculo vermiculum, qui illum roderet. Habebit igitur carcer ille muros suos latos plus quam quatuor millia miliarium Italicorum; quanta scilicet est à superficie terræ ad Infernum distantia: si tamen ipsi crassiores non essent subtilissimâ papyro, tam erunt debiles captivi, ut perfringere illos, & fugâ elabi non possent: *Ligatis manibus & pedibus ejus, mittite eum in tenebras exteriores. Matth. 23.* Quæ igitur, obsecro, conditio erit peccatoris assueti jussa dare, assueti vivere suo arbitrio vel ingratis DEI sui, dum se videbit clausum in loco tam profundo infra pedes rerum conditarum omnium, infra pedes ipsorum Dæmonum, absque eo quod unquam per omnem æternitatem recuperaturus sit libertatem illam, quam tam caram habebat? ô libertatem detestabilem, quæ desinit in servitutem



tem, quæ non habet finem! Quanto  
satiùs erat, modico tempore ferre  
dulce jugum præceptorum DEI,  
quàm vivere in æternum constrictum  
laqueis tam formidandis!

*Tenebrae.*

II.

**C**ONsidera, carcerem hunc non  
tantùm fore angustissimum, sed  
etiam ultra omnem modum tene-  
bricosum. Erit quidem ibi ignis, sed  
spoliatus luce, sic, ut patiantur qui-  
dem oculi ex aspectu horribilissimo-  
rum spectrorum, sed simul destituan-  
tur illo solatio & recreatione, quam  
afferunt fulgura in mediis terrori-  
bus atrocissimarum tempestatum: *Vox*  
*Domini intercidentis flammam ignis. Ps. 18.*  
Verum hoc erit; quia, ut affirmat S.  
Thomas: *ibi erit ardor sine claritate.*  
Prodigio penitus diverso ab illo,  
quod patratum olim est in fornace  
Babylonica; cùm ibi præcepto DEI  
ademptus fuerit igni ardor, & relictæ  
lux; in Inferno autem igni aufere-



tur lux, & relinquetur ardor. Insuper cum illiusmet ignis materia sit sulfur, lucem habebit pallidam ac mœstam; & hæc ipsa permixta fumo magni illius incendii, dum sursum deorsum agitabitur & volvetur, implebit totum spatium vacuum cavernæ illius horrendæ, & constituet procellam quandam tenebrarum, juxta illud quod scriptum est: *Hi sunt, quibus procella tenebrarum servata est in æternum. Judæ 13.* Tandem ipsa multitudo corporum accumulatorum magnam partem efficiet noctis illius formidandæ; cum propè nihil aëris ibi mansurum sit, aut alterius corporis diaphani & transparentis, præter oculos damnatorum, circumfessorum tenebris, & mediâ parte cœcorum (*S. Th. in 4. dist. 50. q. 1. a. 3.*)

Considera nunc desperationem Peccatoris hac ratione sepulti. *Usq<sub>3</sub> in æternum non videbit lumen. Psal. 58.* O infelicium infelicissimum, qui per omnem planè æternitatem ne tenuissimum quidem amicæ lucis

radium aspiciet ! satis fuit nox una, ut penitus canum efficeret miserum aliquem captivum ; quos ergo effectus producet in miseris illis nox, quam nulla porro dies excipiet ? & si inter omnes pœnas Ægypti solæ tenebræ dictæ sunt horribiles: *factæ sunt tenebræ horribiles. Exodi 10. v. 22.* Quod nomen dabimus nos illis tenebris, quæ non tri duo, sed semper durant ?

*Fætor.*

III.

**C**ONsidera, quantum crescat calamitas illius carceris tam angustii, tam obscuri, additamento fœtoris maximi ? Imprimis enim confluent illuc tanquam in sentinam aliquam omnes terræ sordes postquam ultimæ diei ignis eandem Terram penitus purgârit ( *S. Th. in 4. dist. 47. q. 2. a. 2.* ) Insuper sulfur ipsum fœtorem efficiet intolerabilem, dum semper in multitudine tam stupenda ardebit. Et denique corpora ipsa damnatorum exhalabunt odorem  
tam

tam pestiferum, ut unum solum eorum positum in hoc nostro Mundo, ut S. Bonaventura observat, suffecturum esset ad illum inficiendum: *De cadaveribus eorum ascendet fœtor. Isa.* 24. v. 3. ait Propheta, vocando illorum corpora, etsi viva, Cadavera: viva enim erunt ad pœnam, quam tolerabunt; & simul erunt cadavera propter fœtorem teterrimum, quem exhalabunt. Videndum se obtulit S. Martino Dæmonum aliquis vestitus purpurâ, & redimitus coronâ, cum dicto, sum Christus. (*sev. Sulpit. in vita*) adora me, quia dignus sum. At Sanctus cœli luce collustratus, respondit: Dominus coronatus est spinis, & totus perfusus Sanguine: ego in novo hoc vestitum genere non novi illum. Sic detectus malus genius aufugit; fœtorem tamen post se reliquit tam horrendum, ut hic solus Sancto sufficeret ad cognoscendum quis ille fuerit. Si Dæmon unus tam tetrum odorem emisit, qualis erit habitus

litus ille pestifer, quem exhalabit caverna, in qua collecta hæret multitudo Dæmonum & damnatorum omnium simul ligatorum, quin quidquam ejus fœtoris expiret? Ipse aër diu clausus, sine alio additamento, evadit intolerabilis; judica, qualis futura sit sentina tam multarum, tam putidarum sordium, omnis expers exhalationis. Hæc est habitatio, quam sibi sponte eligunt Peccatores in omne ævum, dummodo brevi somno infames putridæ suæ carnis libidines possint explere. Hæc sunt superba illa palatia, quæ sibi apparant suo fastu illi, qui contemnunt pauperes, & tanquam malè olentes à se abigunt. Hoc carcere permutatur ille Paradisus, qui nobis sanguine Filij DEI emptus tantum valet, quantum valet datum pro eo pretium. O permutationem infelicissimam! ô permutationem, quæ deplorabitur immenso mari lacrymarum sine ullo fructu! *Mortuus est dives, & sepultus est in Inferno.*

Ora-



## Oratio.


*Ad Patrem æternum ad evitan-  
dum Infernum apertum.*

**O** Pater cœlestis, Domine immen-  
sæ magnitudinis, & Majestatis in-  
comprehensibilis, quæ demum abyf-  
sus sinu suo potest continere tot pœ-  
nas, ut non sint minores peccatis  
meis: minores temeritate, quâ tibi  
fui perduellis, & volui vivere arbi-  
trio meo? Necesse foret, ut illa po-  
tentia, quâ me olim extraxisti ex ni-  
hilo, & nunc singulis momentis con-  
servas, à te impenderetur ad novum  
Infernum fabricandum & carcerem  
magis horrendum, ut magis respon-  
deret puniendæ meæ iniquitati. Ita  
est, fateor: sed si ego desij esse filius  
tuus, tu non desisti mihi esse Pater.  
Ad te igitur confugio, & ex intimo  
corde te oro rogôque, ut placeat tibi  
destruere, non me peccatorem, in  
peccato meo me condemnando; sed  
meum peccatum in me miserabili,  
igno-



ignoscendo mihi & liberando me à tanto malo. Hoc omnino est opus dignum te, vincere Bonitate tua malitiam meam, & tollere penitus ex Mundo magnum hoc Monstrum iniquitatis meæ; aliter enim si damna- bis me, ego quidem moriar, sed ma- litia mea vivet semper in illis flam- mis, quin unquam moriatur. Re- cordare igitur, quòd sum opus ma- nuum tuarum, quæ me effinxerunt ad imaginem tuam; serva igitur, quod tuum est. *Tuus sum ego, salvum me fac.* Si ego gratiam hanc non prome- reor, promeretur illam tuus ille Filius, quem mihi dedisti Servatorem. A- verte vultum à culpis meis, & defi- ge illum in ipsum: aspice in ipso merita illa infinita, quæ ego tibi of- ferò ad satisfaciendum debitis meis, & ad obtinendam tantam gratiam & auxilium, ut in æternum ampliùs non offendam te: sic ut tibi fideli- ter ad extremum usque momentum serviendo, ope divinæ Misericordiæ tuæ fiam dignus obtinere locum in cale-

cælesti Paradisi gloria, ubi cum omnibus Electis tibi benedicam, & gratias agam in secula seculorum. Amen.



## Consideratio II.

Pro die Lunæ.

IGNIS.

*Ejus qualitas.*

I.

**C**onsidera, divinam Justitiam delegisse Ignem tanquam instrumentum aptissimum ad puniendos suos perduelles. Etiam inter homines majus isto supplicium excogitatum non est; unde meritò dictum est: *Tormentorum ultimum. Curt. l. 6.* Nihilominus non debes tibi persuadere ignem Inferni nostrati similem esse. Felices, ut sic dicam, Animas illas miseras, si alia non sentirent incendia, quàm illa, quæ nostra in  
ter-

terra accendi possunt! Dives ille damnatus, cujus Evangelica historia meminit, non dicit tantum in flamma, sed in hac flamma se cruciari, indicans peculiarem flammæ illius tartaræ qualitatem. Noster ignis hominis bono datus est, ut illo utatur ad opera artis, illo vitam suam sustentet, at ignis infernalis conditus est ad vindictam impiorum. *Vindicta carnis impij ignis. Eccl. 7. v. 19.* Noster ignis sæpe conjunctus est cum materia extranea, & parum respondente virtuti illius activæ, unde est instar gladij in vagina. At ignis Inferni erit instar gladij è vaginâ extracti, cum sit accensus in materia sulfurea & bituminosa, quæ semper ardebit violentiâ quadam inexplicabili, haud aliter ac in fulminibus accidit, quæ tantâ vi feruntur, impetu exhalationis illius inflammata: *Pars illorum erit in stagno ardenti igne & sulfure. Apoc. 21.* Tandem ignis noster absomit id, quod adurit; unde quò est vehementior, tan-

tanto est brevior. At ignis ille, in quo semper ardebunt damnati, uret & non consumet; unde à Christo comparatur sali: *Omnes enim igne salientur. Marc. 9. v. 48.* Cruciando enim ardoribus non explicabilibus tanquam flamma, impedit tamen ne corrumpantur damnati, tanquam Sal. Unde si unica ignis nostri scintilla horrorem nobis incutit, si vel brevissimo temporis spatio ferre non possumus flammulam unius candelæ, quomodo manere poterimus æternum sepulti in incendio supra omnem fidem atroci & violento? O tu, qui propter peccata postremum admissa, & nondum dolore serio expiata, fide certus es, quòd hoc momento moriens præceptis rueres in illam horrendam fornacem, quomodo tandem audebis libellum hunc ante è manibus ponere, quàm ex intimo corde admissarum nostrarum se pœniteat? quomodo tantum tibi audaciæ est, ut vel momentum unicuique, ne dicam menses totos, hære velis

velis in statu obnoxio suppliciis Inferni? quomodo ridere potes, quomodo quietem securus capere? *Potes hoc sub casu ducere somnos?*

### *Quantitas.*

#### II.

**C**ONSIDERA, quantam vim habiturus sit ille ignis propter suam quantitatem. Cùm enim carcer ille infernalis continere debeat omnia damnatorum corpora quin vel unum penetretur cum altero, necesse est ut sit fossa, quæ plura milliaria in suo ambitu, & secundùm omnem suam dimensionem complectatur, si innumerabilem ibi clausorum captivorum multitudinem attendamus. *Infernus dilatavit Animam suam, & aperuit os suum absq; ullo termino. Isa. 5. v. 14.* Tota porro ista ingens specus plena debebit esse igne: & si vel ipsæ paleæ, cùm ingens earum cumulus, congeritur, sufficiunt ad fornaces calefaciendas, quid fiet sulfure illo  
accen-



accenso, quod tam vehemens est suâ  
qualitate, & suâ mole tam vastum?  
Insuper ignis iste erit ibi clausus,  
quin effundi possit; unde omnes  
flammæ ejus repercussione intenden-  
tur, & idcirco vi pollebunt incredi-  
bili. Quis jam ambigere potest, quin  
si mons integer in illud caderet in-  
cendium, mox ceræ instar liquefce-  
ret, Ita fassus est Dæmonum aliquis  
Militi id ex eo quærenti (*Cæsarius apud  
Collect. dist. 6. ex 89.*) & absque isto  
testimonio suppetit nobis assertio ir-  
refragabilis Spiritûs Sancti, qui cer-  
tos nos reddit, appellando flammam  
illam devoratricem montium: *Flam-  
ma comburens montes. Psal. 82.* Et ta-  
men Peccatores pro eo quòd co-  
horrescant, ludunt circa illos ignes,  
perinde ac si essent ignes oblectan-  
dis oculis animisque accensi. *Licet  
ignis ille aestuet, & fluvius flammâ accen-  
datur, nos tamen ridemus, & delicias am-  
plectimur.* Ait attonitus S. Joann.  
Chrysostomus *Hom. 55. ad Pop.* An  
fortassis corpus vobis saxeum, aut du-

durissimo metallo conflatum est? *Nec fortitudo lapidum fortitudo mea, nec caro mea aenea est. Job. 7.* Potestis dicere cum Jobo: Si tamen etiam tali essetis conflati, momento in illis ardoribus colliquesceretis, in quibus vobis habitandum erit semper, nisi ex animo detestemini, & corrigatis vitam perversam. Verum tamen est, quòd parum dixerim, cùm dixi, habitandum vobis semper in illo igne: debebam potius dicere, quòd vos, & ego, nisi timeamus & amemus DEUM nostrum, futuri simus quodammodo totus ignis. Flamma siquidem illa tam viva, tam latè sparsa, non foris tantum nos affliget, ut nunc in terra contingit, sed in ima penetrabit ossa, & medullas, & intimam nostram substantiam: *Pones eos ut alibanum ignis.* Ait Sacer Vates *Psal. 20.* Erit Damnatorum quilibet tanquam furnus ardens, qui flammam suas intra se, & in sinu suo habet: unde bulliet sanguis ille impurus intra suas venas, cerebrum in suo cranio,

nio, cor intra suum pectus, viscera intra corpus illud infelix, quod undique cinctum abyssis flammarum exitum non inveniet. *Quis poterit habitare de vobis cum igne devorante?* Ita *Isaias* interrogat, *cap. 33.* Quis ex vobis poterit habitare cum igne, qui nos devorabit, hoc est, convertet nos quodammodo in se, efficiendo nos totos vivum quoddam incendium? Respondeamus: sed non antè quàm rem omnem seriò perpendimus.

### *Ejus Elevatio.*

#### III.

**C**ONSIDERA, omne quod dictum est de vi, quam obtinebit ignis infernalis, tam qualitate, quàm quantitate sua nihil esse in comparatione illius vis, quam acquireret tanquam instrumentum *Justitiæ divinæ*, quæ illum attolleret ultra omnem vim naturalem ad effectus omnino stupendos. *Descendit ignis à DEO de cælo. Apoc. 10.*

Ignis

Ignis infernalis hujus conditionis erit ; originem suam habebit ad pedem throni divini, hoc est, accipiet ab ejus omnipotentia vigorem quandam incredibilem, operando non juxta propriam suam activitatem, sed tanquam instrumentum cum activitate & virtute sui Agentis, qui flammis illis tantam vim tribuet, quantam existimabit convenire ad vindicandas suas injurias, & reparandas jacturas suæ gloriæ. *Creatura enim tibi factori deserviens exardescit in tormentum adversus injustos. Sap. 10. v. 24.* Quod si ignis est gladius, qui cadens suo pondere plagam in hac vita tam magnam infligit, quantam infliget in Inferno vibratus brachio omnipotente? *Si acuero ut fulgur gladium meum? Deut. 32. v. 41.* Hinc etiam est, quòd, etsi corporeus, urat non solùm corpus, sed & animam : sicut enim DEUS utitur aquâ materiali in lavacro Baptismi ad lavandum non solùm corpus, sed mutandam etiam animam, & sanctificandam, ita uti-



tur etiam igne, licet materiato, in Inferno, ad puniendam illam immundam & peccatricem. Est igitur incendium infernale effectus omnipotentiae divinae contemptae à Peccatoribus, & signum visibile odij illius infiniti, quod Bonitas divina suo sinu continet adversus peccatum: est inventio quædam Sapientiae divinae ad recuperandum honorem sibi ab Impiis ablatum: & idcirco quis explicare poterit, quousque progressura sint illa tormenta, quæ erunt ictus respondens brachio Altissimi, & inventio digna ejus mente? *Quis novit potestatem iræ tuæ? Psal. 99.* Cum nos pertingere non possimus ad concipiendum animo illud, quod omnem vim naturæ superat, quomodo poterimus pertingere ad illud explicandum? idcirco care mi Lector, *Miserere animæ tuæ. Eccl. 30. v. 22.* Et si hujus rationem nullam habes, saltem tangat te miseratio ipsius corporis tui, pro quo tam es sollicitus omni tempore. Perpende quàm caro

rò



rò tibi constituræ sunt voluptares illæ  
 vetitæ, quas tamen indulges carni  
 tuæ, quantumvis repugnante divinâ  
 Lege. Aspice accensam jam forna-  
 cem illam sempiternam: jam nunc  
 flatus iræ DEI servit illi pro folle ad  
 augendam sine modo ac mensura  
 vim flammæ illius: jam ardent  
 in illa tam multi propter minora de-  
 licta quàm sint tua. Non est idcirco  
 hoc tempus accumulandi novis pec-  
 catis novam illis augendis materiem,  
 sed illas seria pœnitundine & lacry-  
 mis extinguendi. *Tempus flendi: Eccl. 3.*  
*Væ vobis, qui ridetis nunc, quia lugebitis &*  
*flebitis. Luc. 6. v. 25.*

## Oratio.

*Ad æternum Verbum, ut nos  
 liberet ab Inferno.*

**O** Fili DEI, qui miseratione ma-  
 lorum nostrorum factus es filius  
 hominis, en ovem illam perditam,  
 quam tu Pastor bonus quæxivisti tot  
 B 2 labo-

laboribus, emisti tam copioso sanguine: hanc tu nunc perire fines, quin aliquam ejus habeas rationem? Non ita sit ô Domine. Tolle potius illam in humeros tuos, & ostende toti cælo fructum laborum tuorum, & pretium divinæ vitæ tuæ. Si salutem mihi conferes, lætabuntur Beati omnes, omnes Angeli te laudabunt, & ego per omnem æternitatem cum ipsis misericordias tuas cantabo. Age igitur bone JESU, misere mei & libera animam meam à faucibus Leonis istius infernalis, qui ad ignominiam tuam me cuperet devorare. *Libera me de ore Leonis.* Verum est, quòd ego te non habuerim pro DEO illo magno, qui re vera es; cùm toties præhabuerim belluinum aliquod desiderium meum divinæ tuæ voluntati: sed doleo ex animo, & detestor hæc omnia, retracto illa, & nulla esse jubeo; solùm quia tu es sumum bonum meum, & quia te amo, & volo te amare super omnia, sicut meretur infinita tua perfectio, desi-

desiderans simul etiam majorem dolorem, quàm habeam, ad reparandam hoc actu gloriam, quam tibi noxis meis abstuli. Illa igitur Misericordia, quæ te impulit ingenti amore ad suspendendam vindictam, dum admisi ipsum peccatum, hæc etiam nunc te inducat ad mihi penitus ignoscendum, dum ante te me abjicio. Accipio hanc animam & illam repono in divinis tuis manibus. *In manus tuas Domine commendo spiritum meum.* A manibus DEI vivi, quibus excidere metui, provoco ad manus DEI in Crucem acti, & pro me mortui: istæ me judicent, istæ de me sententiam ferant, hîc manere fixum est, ubi tu tanto amore salutem meam descripsisti ad gaudendum hoc fructu per omnem æternitatem.

Amen.



# Consideratio III.

Pro die Martis.

SOCIETAS.

*Damnatorum.*

I.

**C**onsidera ingens tormentum ,  
 quod habitationi infernali ad-  
 jungent habitatores. Vivere cum  
 socio perverso res est usque adeò  
 molesta, ut ipsæ adeò plantæ fixæ in  
 terra ab ea videantur abhorrere ,  
 dum recedunt & fugiunt quantum  
 possunt à plantis aliis sibi contrariis.  
 Certum est, quod Spiritus Sanctus  
 nos securos reddat; tolerabilius esse,  
 vivere cum feris in deserto, quàm  
 vivere cum muliere rixosa & ira-  
 cunda. *Melius est habitare in terra de-*  
*serta, quàm cum muliere rixosa & ira-*  
*cunda. Prov. 21. v. 19.* Miser aliquis  
 maritus, qui non audit domi suæ nisi  
 clamores, & lamentationes, sub ve-  
 spe-

sperum invitissimus domum revertitur, horas annos putat, donec iterum domo prodire liceat. Cogita nunc tu, quàm molestum futurum sit, vivere perpetuò cum Damnatis, quando cum uno solo illorum vivere, non dicam in Inferno, sed in ipso adeò Cælo, futura esset pœna intolerabilis. Sicut in Cælo omnes pleni sunt caritate, & se non magis quàm alios amant, sic in Inferno omnes pleni erunt odio, & mutuò sibi volent pessimè, inimiciâ ejus generis, quæ in æternum non possit mutari pace ac concordia: cùm enim ibi leges omnes turbatae sint, & omnis exulet ratio, non erit ibi nec sanguis, nec cognatio, nec patria, nec vinculum, nec ullum argumenti genus, quod mitigare valeat rabiem illam desperatam. *Spinæ congregatae igne comburentur. Isa. 33.* Simul erunt tanquam spinæ, quæ se mutuò pungent, se lacerabunt, & nemo non alteri ingens erit tormentum. Quàm irascitur æger illi, qui



opem licet rogatus, ferre recusat?  
quàm furit laborans podagrâ, cùm  
nullâ curâ & cautelâ tractatur?

Et tamen hæc umbra duntaxat est  
desperationis miserorum illorum qui  
invicem erunt & sibi, & aliis mole-  
stissimo oneri. Soli clamores & eju-  
latus, quibus implebunt omnia,  
sufficient ad eos intolerabiles effi-  
ciendos. Mater aliqua quæ tota  
nocte plorantem & ejulantem audit  
parvulum filiolum, ferre illum non  
potest, & licèt illum non minùs  
quàm se ipsam amet, irascitur, &  
mala illi precatur. Quales jam im-  
precationes, quæ furiz erunt Repro-  
bi alicujus inter tot lamenta, inter  
tot planctus & ululatus, non dicam  
jam cari filij, sed multitudinis ini-  
micæ, innumerabilis, nec spatio unius  
tantùm noctis paucarum horarum,  
sed spatio noctis sempiternæ? Et ta-  
men est inter Christianos nonnemo  
tam insanus, qui putet se solatii ali-  
quid inventurum in illo barathro  
pœnarum ex eo, quòd non solus,  
sed

sed cum multis illas sit toletaturus? Si ad Infernum detrudar, ajunt, non ero ibi solus. O infani! ô infani! quò plura congeruntur in fornace ligna, an non ardor tanto augetur & crescit amplius? Ex *damnatorum multitudine pœna singulorum augetur*: doctrina est S. Thomæ. in 4. dist. 50. q. 2. a. 1. Quanto plures erunt, tanto patientur amplius, cum sua quilibet tormenta reflectat in alterum, dolor cujuslibet dolorem alterius reddat graviolem, & miseria unius alterius miseriam geminet. Infelici alicui molesti sunt ipsi adeò vultus carissimorum quorumlibet, & nauseam creant dulcissima illi consolando prolata verba. Et tu mitigationem speras ex consortio & aspectu hostium tuorum infensissimorum?

*Demonum.*

II.

**C**ONsidera, acerbiolem adhuc futuram Societatem malorum Dæ-

monum, tanquam eorum, qui non inimici tantum, sed carnifices etiam sunt, & ministri Justitiæ divinæ. Isti duplici ratione affligent damnatos, aspectu, & exprobrationibus. Aspectus alicujus Dæmonis usque adeo horribilis est, ut S. Franciscus, cum unum eorum aliquem vidisset, socio suo Ægidio sit confessus; absque eo quod DEUS vires alicui præter ordinem conferat, ne per pauca quidem momenta monstri talis aspectum ferri posse, quin ille ipsa morte stet. *Chron. p. 2. l. 1. p. 4. tit. 14. cap. 5.* S. Antonius in Summa sua, de Decalog. tract. 1. c. 28. narrat de Religioso aliquo, quod, cum Dæmonem vidisset, dixerit, malle se ingredi in fornacem ardentem, quam denuo eundem, aut alium videre. Sancta Catharina Senensis istud præterea cum Christo loquens affirmabat, quod potius quam denuo aspiceret horribilem ejusmodi averni formam, parata sit ambulare per viam totam igneam usque ad extremum Mundi diem.

diem. Juxta has assertiones sufficeret unicum istorum monstrorum ad formandum & constituendum integrum Infernum : & tamen erunt ibi tanto numero, ut propè infinita videantur. *Hostis meus terribilibus oculis me intuitus est*, ajebat Job. 16. v. 10. in persona Peccatoris, trepidantis ad solum aspectum spectrorum tam deformium. Quid jam erit, quando aspectui jungentur irrisiones & opprobria? Incidisti tu quoque in casus nostros, dicent maligni illi ad quemvis istorum infelicium : disce nunc fidere proditoribus: Insane, vinculis constringende, poteras obtinere salutem re tantillâ, restituendo quod tuum non erat; abrumpendo pravam illud consortium; agendo modicam pœnitentiam : & tamen noluisti. Quem accusare potes ut exitij tui causam? tu solus illa fuisti. Maledic jam & morere : sed morere quin unquam vivere desinas, & patere absque ullo fine. Lusor, amissâ omni pecuniâ, omni jacturâ

molestiùs fert opprobria suam ipsi infelicitatem exprobrantis : laceratum pagellas lusorias, evertit mensam, fremit, furit, & non timet ipsam adeò vitam ad vindictam sumendam exponere discrimini. Dammati in rabiem quidem agi poterunt, & vindictæ cupiditate accendi, vires autem se vindicandi nullas habebunt. Ringantur licet, necesse erit audire, videre, pati, quin iram in alium exerant. Interim quæ vita erit ista mille mortibus deterior? vivere semper inter hostes tam horribiles, inter Carnifices tam crudeles?

Ecclesia permittit, ut separentur à cohabitatione conjuges, quando inter eos nascitur inimicitia & feritas non ordinaria, miserando infelicem ejus conditionem, qui cum socio inimico vivere cogitur. Utinam in loco illo infelici miseratio ejusmodi locum & ipsa habere posset, sic, ut si patiuntur miseri, paterentur soli, & ferrent secum Infernum suum in aliquem terræ angulum, tanquam



caveam igneam, unis ipsis destinata-  
tam ! Sed nihil spei superest ad ob-  
tinendum hoc bonum : *Peccator vide-  
bit, & irascetur ; dentibus suis fremet &  
tabescet* : videbit turpitudinem suo-  
rum carnificum, audiet injurias, fre-  
met rabie, & sine ullo fructu tabe-  
scet : *Desiderium peccatorum peribit.*

### *Complicum in peccato.*

#### III.

**C**ONSIDERA, supra omnem fidem fo-  
re cruciabilem societatem Com-  
plicum in delicto ; cùm æquum om-  
nino sit, ut fiat instrumentum sum-  
mi cruciatûs ad satisfaciendum divi-  
næ Justitiæ, quisquis Peccatori fuit  
minister detestandæ voluptatis ad  
eandem offendendam. Idcirco furia  
omnium crudelissimæ in illa abyssos  
erunt procul dubio Amici illi & A-  
micæ, quorum causâ quis tergum  
DEO obvertit. Tunc verum fiet id,  
quod minatus est Josue, ut omni illi,  
quicunque amicas vellet creaturas,  
in

in præjudicium amoris debiti ipsi Conditori, illæmet evadant sudes in oculis : *Sint sudes in oculis vestris Job. 23. v. 13.* Cruciando reos aspectu, & memoriâ, supra omnem aliam quamlibet sævam carnificinam. Quis sibi satis imaginabitur maledictiones, blasphemias, execrationes, quas alius in alium conjiciet, dum se invicem devorare cuperent? *Unusquisq; carnem brachij sui vorabit : Manasses Ephraim, & Ephraim Manassem; simul ipsi contra Judam. Isa. 9. v. 20.*

Care mi Lector, DEUS avertat, ne unquam cadas in illud profundum, ut pro me, & te vehementer etiam atque etiam precor. Scias tamen velim jam nunc, si unquam pessima forte tua eò casurus esses, nulum fore Dæmonem, qui tantum te torqueat, quantum tortura est persona illa tam perditè amata. Vultus ille, quem tu nunc Paradisum appellas, tam tibi teter videbitur, ut ejus respectu ipse tibi Lucifer pulcher videatur. Illi oculi, quos tu nunc  
tam

ram stultè vocitas tua sidera, sagittæ tunc erunt omni fulmine acutiores. Crines illi, qui merum tibi aurum videntur, mutabuntur in viperas crudeliores omni Dracone: verbo, habebis in illa armamentarium integrum pœnarum, Infernum æqualem, aut etiam deteriorem Inferno reliquo, dum momento quolibet perpendes, pro quantillo putridæ carnis jacturam feceris pulcherrimi vultûs divini; pro quantillo bono te obnoxium reddideris æternæ calamitati. Principum nonnemo victus in bello & captus, cùm videret subditum quendam suum æmulum & victorem, aut tollite hunc, aje-  
bat ad circumstantes, aut miserati meam sortem occidite me. Prô miser Peccator! quam mortem non volens ac lubens subires, ut ex oculis tibi tolleretur illa, quam tu Ethnicici potius, quàm Poëtæ phrasi, Deam tuam appellabas! Jucundum tibi esset sepeliri in barathro profundissimo; lenimen dolorum tuorum  
cre-

crederes habitare cum draconibus, & societatem ipsorum censeris jucundam. Sed non est malo remedium: maledicere potes illi furie, illam detestari & execrari, ab ejus consortio separare te non potes. Interim quid tibi de habitatione ista videtur? Parricidis olim hoc erat decretum supplicium, ut culeo infuti cum Serpente, Gallo, & Simia in mare abjicerentur. Sed ô mitia Legislatorum humanorum ingenia! non satis intelligunt pœnarum naturam. Aliam societatem invenit Justitia divina ad puniendos suos reos; locum plenum Carnificibus, & supplicio affectis; plenum odio & insultationibus in medio maris ignei, quod & littore, & fundo caret! Et tamen invenire est, qui talem locum pro domo sua æterna eligant, & ut eligant, contemnunt pulchram illam Jerusalem cælestem. *Lata porta, & spatiosa via est, quæ ducit ad perditionem, & multi intrant per eam. Matth. 7. v. 13.* Non vi eò raptantur nolentes, ipsi

volentes suis eò pedibus proficiscuntur.

## Oratio.

*Ad Spiritum Sanctum ad evitandum Damnationem.*

**O** Spiritus Sanctissime, qui cum Patre & Filio unus solus DEUS es; adoro te ex abyſſo mei nihili, & demiffiffimè tibi in memoriam revoco, quòd ſine gratia tua, ne quidem cogitare quidquam poſſem, quod conferat ad meam ſalutem. *Sine tuo Numine, nihil eſt in homine, nihil eſt innoxium.* Quomodo igitur ſine ope tua ſuperare potero diſcrimen omnium maximum, cui obnoxius ſum æternùm pereundi propter tot peccata mea? Ah Domine, ad te pertinet ſubvenire debilitati meæ, & eſt gloria tua, triumphare in me de tuis, & meis inimicis me ſolvando. An non tu es Spiritus ille Paraclitus & Conſolator? quomodo igitur me ſines incidere in æternam miſeriam?  
Tu



Tu qui es sustentator meus, tu qui ex ventre matris meæ me acceptâsti ut tuum, nunc occludes precibus meis aures tuas? & non sustinebis eum qui te uno nititur? non ita fiat unquam: Ego in te spero, & scio quia non confundar; dum expecto, ut glorificem misericordiam tuam cum Sanctis tuis in cælo, etsi toties promeritus sum experiri rigorem Justitiæ tuæ cum aliis Reprobis in Inferno. Et quia par non est, ut mei unius memor sim, rogo te etiam pro omnibus Christianis fratribus meis, & tibi non minùs omnes Peccatores, quàm Animam meam commendo. Claude obsecro gratiâ tuâ abyssum illam, quam ipsi culpis suis semper magis dilatant: illumina mentes eorum, ut cognoscant, quò tandem ducat perversa vita ipsorum: & da illis robur ita sese emendandi, ut servientes tibi in hac vita mereantur semper te frui in beata æternitate. Amen.

# Consideratio IV.

Pro die Mercurij.

## DE POENA DAMNI.

*Factura infinita.*

I.

**C**onsidera ingentem jacturam, quam facit Anima damnata, amittendo DEUM pro omni ævo, & cum ipso amittendo omnia illa gaudia, quæ sperare poterat ex possessione ejus. Quis unquam dignè explicabit, quid sit, in æternum privatum esse summo Bono? Dicere de hoc possumus, quod S. Augustinus dixit de Beatitudine : *Acquiri potest, æstimari non potest.* Ita è diverso etiam poena Damni sentiri potest, explicari non potest, non à Reprobis modò, sed ne à Beatis quidem. Hæc poena re ipsa est Infernus ipsius Inferni, & in ipsa consistit essentia Damnationis, ut S. Thomas docet.

*Dam-*

*Damnatio ultima consistit in hoc, quòd intellectus hominis totaliter divino lumine pri-  
vetur, & affectus à divina Bonitate obsti-  
natè avertatur. Opusc. 2. c. 147. Estque  
idcirco pœna infinita, sic ut si, millies  
ac millies duplicaretur incendium  
ignis illius devorantis, tormentum  
tamen illud nunquam æquaret. Si  
mille quis ponat gehennas, nihil tale dictu-  
rus est, quale à beatæ illius gloriæ honore  
repelli. Chrys. hom. 24. in c. 7. Matth. Eâ  
omnino ratione, quâ si millies mil-  
liésque geminarentur omnia alia cæ-  
lestis patriæ oblectamenta, nullo mo-  
do æquarent illud gaudium, quod  
in DEO facie ad faciem videndo  
consistit. Idcirco sicut DEUS non  
est bonum, quod nos mente com-  
plecti possumus, sed bonum omni  
nostra cogitatione infinities majus,  
ita malum amissionis DEI non est  
ejusmodi, quod concipere in hac  
mortali vita possumus, sed omni no-  
stra cognitione infinities majus: ma-  
lum, cujus author proximus DEUS  
ipse est; malum, ut sic dicam, ordi-  
nis*

nis divini; malum quod DEUS per modum pœnæ ipse constituit. Est & turpium pœna DEUS, ait S. Bernardus l. 5. de Consid. c. 32. Quo vult indicare; quòd sicut DEUS est suprema Beatitudo Electorum in cælo, ita sit futurus suprema pœna Dam-natorum in abyſſo. Tunc fiet illud terribile divortium, tunc stabilietur æterna illa inimicitia, perpetua illa oppositio inter creaturam & Crea-torem. *Vos non populus meus, & ego non ero vester. Os. 2.* Creatura non erit ampliùs Creatoris, quantum ad par-ticipandum ab eo ullum genus so-latij: Creator non erit ampliùs crea-turæ, quantum ad accipiendum ab eo ullum genus protectionis. Crea-tura odio habebit, detestabitur, exe-crabitur DEUM in æternum, quin ab eo possit recedere: & Creator abhorrebit, abjiciet à sese æternum creaturam, semper tamen illi con-junctus ad eam cruciandam & pu-niendam. O separationem! ô con-junctionem! utramque sine compa-ratio-

ratione doloriferam : & tamen non  
 timent Peccatores ! Officium Judicis  
 Leges appellant, *Authoritatis formidabile*  
*ministerium : apud Cresol. in Mystag.* quia  
 octo genera pœnarum contra Reos  
 decernere potest : & non timetur ille  
 DEUS, qui postquam sceleratis in-  
 numerabiles pœnas decrevit, se ipsum  
 facit eorundem supplicium. *Quis non*  
*timebit te, ô Rex gentium ? Jer. 10. v. 7.*

### *Factura summi Boni.*

#### *II.*

**C**ONsidera, Peccatores nunc par-  
 vi facere istam summi Boni jac-  
 turam ; cùm enim omnia sensibus  
 metiri consueverint, non capiunt  
 illud malum, quod sensibus non per-  
 cipitur. Præterquam quòd cùm ipsis  
 volupe sit vivere procul à DEO, non  
 intelligunt, quodnam tormentum sit,  
 æternum esse ab eo separatum. Sed  
 in hoc suo judicio, ut in multis aliis,  
 planè se stultos demonstrant. In  
 hac siquidem vita non habemus,  
 nisi cognitionem valdè obscuram in-  
 fini-



finitæ felicitatis, quæ est, frui DEO: cum Damnati è diverso habituri sint pro suo tormento apprehensionem vivacissimam tanti boni; & cum semper iis obversaturum sit, quod suâ culpâ illud perdiderint, rabie & desperatione consumentur. Falco quamdiu prædam non videt, non se movet: at ubi eam viderit, ô quanto se impetu vibrat, & conatur rumpe-  
re vincula, quibus impeditur, quo minùs illam assequatur! Præterea hac in vita Anima corporis mole premitur, in eâque detinetur tanquam ignis sub cinere in statu naturali. At expedita membris, tanquam ignis in cuniculo incensus, est in statu violento; & idcirco sicut ille strages & ruinas edit, ut erumpat ex suo illo carcere, sic ista ad jungendum se suo centro, quod est DEUS. *DEUS cordis mei.* Et quia eodem ipso tempore à DEO repellitur tanquam indigna, explicari non potest, quantum illa in se dolorem experiatur, coacta perpetuò hærere extra suum  
lo-

locum. Os aliquod extra suam juncturam cruciatum affert non explicabilem: cogita igitur omnia illa ducenta & plura ossa, quibus humani corporis moles firmatur, loco suo mota esse: quis explicet, quantum ea res corpori molestiæ afferat? Et tamen hoc non nisi somnium est in comparatione afflictionis, quam sentit Anima ex eo, quòd sit procul à suo fine, qui est DEUS: quanto enim superior corpore est anima, tanto necesse est ejus dolores, corporis doloribus esse acerbiores. Quod si dolor effectus est divisionis, certum est, quanto arctior erat conjunctio, tanto etiam acerbiores fore separationem: cùm ergo motus animæ ad DEUM, in quantum hic est suprema felicitas Animæ rationalis (S. Th. I. 2. q. 9. a. 4. ad 2.) sit motus naturalis, necessariò consequens est, ab illo, ad quod toto naturæ suæ pondere & impetu fertur, & contrariâ vi, & pro omni tempore separari, futurum tormentum omni compara-

paratione majus, & duplici ratione infinitum; & propter bonum, quo privat, quod est divinum, & propter tempus, quo pergit eam privare, quod est æternum. Quid dicet proinde infelix Peccator cùm audire contigerit fulmen illud horrendum fatalis sententiæ? *Discede à me maledicte in ignem æternum.* Discede maledicte per omne ævum à me DEO tuo, ut habites cum inimicis tuis in igne sempiterno. Scimus non semel Matrem redactam in servitutem, dum à filio suo avulsa est, sororem dum à sorore, doloris vehementiâ mortuas concidisse: quam ergo mortem sentiet Anima avulsa à DEO per omnem æternitatem? Sentiet mortem, non illam quæ est finis omnium dolorum; sed illam, quæ est initium dolorum, qui durabunt in æternum.

### *Debita Peccato.*

#### III.

**C**ONSIDERA, hanc amarissimam separationem, hanc jacturam in-  
C fini-

finitam peccato justè esse debitam ;  
cùm ipsa iterum in Universo redi-  
gat in ordinem, quod culpa pertur-  
baverat. In peccato siquidem du-  
plex malitia intervenit ; una est , ter-  
gum obvertere Bono increato , ni-  
hili ducendo divinam ejus volunta-  
tem, & parvipendendo divinam ami-  
citiam. Altera est, vultum obverte-  
re bono creato ; in illo reponendo  
suum finem , & suam quietem. *Duo  
mala fecit populus meus*, ait Dominus,  
*me dereliquerunt fontem aquæ vivæ*, ecce  
aversionem à DEO , *foderunt sibi ci-  
sternas dissipatas*. *Jer. 2. v. 13.* En con-  
versionem ad creaturam : & in hac  
duplici malitia consistit malum cul-  
pæ lethalis. Utrique huic ordinis  
perturbationi medetur divina Justi-  
tia in Inferno , ubi conversionem ad  
creaturam punit operâ ipsarum crea-  
turarum ; hoc est, operâ ignis, tene-  
brarum, fœtoris, carceris, Dæmo-  
num, pœnâ sensûs : & punit aver-  
sionem à DEO , privando ipso DEO  
per pœnam Damni. Ex quo conse-  
quens



quens est, quòd, cùm sine comparatione major sit prima malitia aver-  
sionis à summo Bono, quàm sit se-  
cunda, quærentis suam voluptatem  
in rebus vetitis, necessariò etiam pœ-  
na Damni, quæ respondet primæ,  
absque comparatione major sit pœ-  
nâ sensûs, quæ respondet secundæ.  
Quin imò consequens est, ut cùm  
aversio à DEO sit injuria quodam-  
modo infinita illata Creatori, pœna  
quoque Damni illi debita sit quo-  
dammodo infinita miseria creaturæ  
perduellis & damnatæ. Et quia crea-  
tura secundùm naturam suam capax  
non est tantæ pœnæ, quantam me-  
retur hæc injuria DEO per aver-  
sionem ab ipso illata, idcirco divina  
Justitia suâ virtute supplebit, effi-  
ciendo, ut mens Damnati vivacissi-  
mè apprehendat malum suum, quod  
semper illi obversetur, quin vel ad  
momentum aliò possit se avertere.  
*Evigilabunt in opprobrium, ut videant sem-*  
*per. Dan. 12.* Adjuvando hanc co-  
gnitionem infelicissimam, ut summè



miseri sint, lumine quodam pœnali, haud aliter ac lumine quodam gloriæ idemmet DEUS adjuvat mentes Beatorum in cælo, ut summè felices evadant. Et hoc nititur diversitas pœnæ, quam sentient Peccatores ex amisso DEO. Nam etsi illum omnes æqualiter perdituri sint, nihilominus illi, qui plurium culparum rei sunt, pluribus etiam capitibus illo privati manebunt; faciétque divina Justitia, ut ipsi tanto magis & meliùs hanc privationem cognoscant, & tanto acerbiores cruciatum experiantur. Hinc observa, quàm penitus insaniant, qui dum culpas culpis cumulant, se subinde solantur liberè pronuntiando: Perinde est damnari ob unam, quàm ob centum noxas admissas. Infelices! Ita vestri misereatur DEUS, ne præcipites in illam abyssum abeatís; quàm bellè, si fecus accadat, observabitis vestro malo inter utrosque discrimen. Qui ob unum peccatum admissum damnatur, unum Infer-

num

num patitur tam pœnæ sensûs, quàm pœnæ damni, respondentium illi culpæ: qui ob centum peccata damnatur, totidem quasi Infernos patitur, pœnâ utriusque generis respondente mensuræ peccatorum, & perinde habet, ac si tot vicibus damnatus esset, quot sunt tituli, ob quos est damnatus. Si igitur nos discrimen facimus inter eos, qui sanguinem mittunt ex eo quòd scalpello obtusiore aut acutiore aperta sit vena, quòd manu chirurgi aut levior, aut gravior vulnerati sint, quî tandem fieri potest, ut eò veniamus insaniam, ut non discernamus inter unam alterâmq; æternitatem pœnarum, quas excogitavit Sapiencia DEI irati suo inimico? Non miror equidem si plus quàm trecenties Sacer Codex Peccatores stultos appellat: digni enim sunt tali nomenclaturâ: & si stulti alij funibus ligantur, ipsi catenis constringendi essent.

## Oratio.

*Ad JESUM Christum pro Salute consequenda.*

**C**Hriste JESU Salvator mi, qui infinitæ milericordiæ tuæ excessu factus es Advocatus meus apud Patrem cælestem, quid aliud ego justius à te petere possum, quàm rogare te ut defendas causam tuam? *Judica causam tuam.* Causa revera mea est, quia agitur de æterna mea salute: sed tua etiam est, quia agitur de gloria tua: tunc enim plenè Salvator meus es, quando re ipsa salus mihi obtingit. *Ipsè erit Salvator meus. Job. 13. v. 16.* Fuit enim verò excessus miserationis infinitæ, impendio sanguinis tui liberâsse me de profundo, in quod me præcipitârunt peccata mea: quid tamen mihi proderit, si ego elapsus manibus tuis in eandem abyssum præceps ruam? *Quæ utilitas in sanguine tuo, dum descendo in corruptionem?* Penes te facultas est faciendi ne peream, cùm in divinis mani-

manibus tuis positæ sint sortes meæ:  
*In manibus tuis sortes meæ.* Si proinde  
claudere vis supplicibus precibus  
meis aures tuas, necesse erit, ut pro  
me mutes amabilissimum illud no-  
men JESU, spei ac dulcedinis ple-  
nissimum; necesse erit, delere pro  
me promissiones illas, quibus spo-  
pondisti, quòd velis esse vita mea.  
Age igitur, JESU esto mihi JESUS  
& salva me: plus mihi promeritus  
es boni morte ac cruciatibus tuis,  
quàm ego sim meritus mali iniquita-  
tibus meis: æquum proinde non est,  
ut plus valeat debitum meum ad  
me condemnandum, quàm solutio  
tam copiosa & abundans ad me sal-  
vandam. Igitur amabilissime Re-  
demptor mi, monstra Patri tuo vul-  
nera tua, quæ eum in finem retinuisti  
in corpore tuo glorioso: roga pro me  
illam misericordiam, quæ tibi omni  
jure debetur, ut tuis meritis locuple-  
tatus veniam ad gaudendum tecum  
in æternum fructu laborum tuorum.  
Amen.

# Consideratio V.

Pro die Jovis.

## VERMIS CONSCIENTIÆ.

*Memoria oblectamentorum præteritorum.*

I.

**C**ONsidera, quòd sicut in cada-  
veribus ex putredine nascun-  
tur vermes, ita ex corruptione pec-  
cati nascatur in Damnatis remor-  
sus quidam perpetuus, qui vocatur  
Vermis conscientiae, quia rabido  
quodam despectu cor illis rodet sine  
ulla cessatione. *Vermis eorum non mo-  
rietur. Marc. 9.* Quæ sunt verba Chri-  
sti, tertium repetita in eodem ser-  
mone, ut pœnæ hujus acerbiterem  
inde colligamus. Sanctorum sen-  
sus est, hac quoque in vita non esse  
carnificem Peccatoris atrociorē,  
quàm Conscientiam. *Ipsæ est pœna sua,*  
inquit S. Augustinus, *quem torquet con-*  
*scien-*



*scientia sua: In Psal. 36. & S. Gregorius; Inter innumerabiles afflictorum molestias nulla est major afflictio, quàm conscientia delictorum. In Psal. 143. Sed si rem dicere volumus, nunc conscientia potius fungitur munere satellitis, evocantis Peccatorem ad Tribunal divinum, quàm munere Carnificis torquentis. Hoc ejus officium erit in Inferno; postquam enim anima erit condemnata sententiâ irrevocabili, divinus Judex tradet eam tortori; in manus inquam tortoris istius, quî per omnem æternitatem quietis partem illi nullam relinquet. Iste porro vermis, omni aspide ferocior, tres cordi Dammati plagas infliget, quæ tribus explicari possunt verbis Innocentij Pontificis in suo libro de contemptu Mundi: Affliget memoria, fera turbabit pœnitentia, torquebit angustia.*

cap. I. Affliget memoriâ oblectamentorum præteritorum: ferâ pœnitentiâ peccatorum admissorum; & angustia bonarum occasionum neglectarum. Et primò quidem affliget

*memoria.* Magnum est tormentum infelici meminisse felicitatis pristinae: *Ego ille quondam opulentus repente contritus sum. Job. 16.* Quid dicet proinde Peccator in abyſſo, quando recordabitur, quod solitus fuerit, omnibus incutere sui timorem, etiam blasphemias contra DEUM eam in rem usus cum ejus injuriâ; nunc autem sit ita infirmus, ut ne pili quidem intervallo se movere possit in latus alterum? Si meminerit, antea ad tuendam dignitatem suam tot molitum se esse vindictas, nunc autem se rabie emori sub pedibus malorum Dæmonum; *Vadent, & venient super eum horribiles. Job. 20. v. 25.* nec tamen tanti contemptus sensum ullam posse prodere. Prius se datum penitus oblectationibus, gulæ suæ appetitum explēsse omni forte crapularum, carnis pruritum omni forte impuritatum, fugisse quidquid molestum erat; nunc autem semper sibi plorandum, semper patiendum, semper moriendum præ desperatione.

ne. *Crucior in hac flammâ.* O memoriam funestam ! ô permutationem luctuosam ! Utinam saltem posset, ut hac in vita, dispellere molestas has cogitationes somno, mitigare colloquiis, obruere novis oblectamentis ! Sed frustra hæc. *Qui me comedunt, non dormiunt. Job. 30. v. 17.* Vermis iste non obdormiscit; in hoc Tribunali nullæ unquam sunt feriæ. Non poterit unquam Anima cessare à suis operationibus; nunquam mentem aliò avertere; necesse erit, velit nolit, semper hæc memoriâ volvere. Quis proinde concipere potest, quale spectaculum futurum sit menti Damna- ti brevis illa voluptatula, quàm à creaturis contra DEI mandatum quasi furtim decerpfit?

Tellus è cælo empyreo conspecta ne punctum quidem videtur: qualis ergo videbitur vita nostra tam brevis aspecta ex fundo, ut sic loquar, æternitatis? Si Peccatori ad extremam vitæ lineam admoto vita vide- tur tanquam somnium volans, qualis

ipsi videbitur post myriades myriadū  
seculorum elapsorum in fornace ar-  
denti tot inter tormenta? Una hora  
sufficeret ad reddendam ipsi infeli-  
cissimam memoriam: *malitia hora ob-  
livionem fecit luxurie magnæ. Eccl. II. v. 19.*  
Cogita, qualis infelicitas futura sit  
post numerum annorum semper ma-  
jorem meminisse boni sordidi, mo-  
mentanei, præteriti instar umbræ,  
& permutati cruciatu æterno? Illi  
qui abjecerunt animam & salutem  
ut singulari pugnarent certamine, ne  
sua designatione fraudarentur, ne  
desererent familiaritatem turpem, ne  
ignoscerent offendenti, ut familiam  
aliquanto altiùs eveherent, quid di-  
cent quæso, quando videbunt inter  
illas tenebras abolitam omnem me-  
moriam familiæ, consumptam à ver-  
mibus illam mulierculam, redactam  
in cineres domum, patriam, terram  
omnem flammis extremæ diei? Cru-  
ciatus futurus esset intolerabilis, ele-  
gisse noctem unam transigendam in  
flammis, ut mille annis vitæ liceret  
frui

frui omni genere voluptatum. Qualis igitur, quæso, cruciatus erit elegisse æternitatem vitæ in abyſſo malorum omnium, dummodo liceret bibere pauculas guttas venenati oblectamenti? *Gustans gustavi paululum mellis, & ecce morior. 1. Reg. 14.* O mortem, quæ finem nescit! ô stultitiam, cui par alia nulla est!

*Pœnitentia Peccatorum admissorum.*

II.

**C**ONSIDERA secundum vulnus vermis hujus devorantis, quod erit Pœnitentia sera & infructuosa de peccatis admissis. *Sera turbabit Pœnitentia.* Peccatum in hoc Mundo sceleratis res est risu digna. *Quasi per risum stultus operatur scelus. Prov. 10. v. 24.* Non aliud in eo apprehendunt malum, quàm innocentem quandam deformitatem: *Deformitas sine dolore:* & idcirco nonnunquam inde superbiunt, se jactant, perinde ac si maculæ animæ servire ipsis possint, ut  
ma-



maculæ marmoris, pro augmento venustatis. Sed noli dubitare, quin iudicium in profundo Inferni, ubi aspectus monstrosissimus unius culpæ gravis causa erit doloris multo magis inexplicabilis, quàm aspectus omnium aliorum monstrorum infernalium. S. Catharina Genuensis (in vita c. 20.) in hac veritate tantopere illustrata à DEO, dicere ei solebat, ut potius momento mortis suæ objiceret sibi deformitatem omnium Dæmonum spectandam, quàm turpitudinem vel minimi actus pugnantis contra divinam ejus voluntatem. Argue idcirco hinc, quantus cruciatus sit futurus intueri æternùm abominations omnium flagitiorum, quales in se ipsis sunt. Dixi autem primò, intueri æternùm; divina siquidem Justitia affiget intellectum Reptobi ad cogitandum perpetuò malum quod perpetravit, & voluntatem ad illud detestandum, quin unquam alterutram facultatem aliò possit divertere. *Iusto DEI iudicio omnia*

nia peccata memorantur, & de omnibus  
continuo torquentur, ait S. Bonaventura in 4. dist. 50. qu. ult. Crudelissima  
fuit illa vindicta Mariti, cui tori fi-  
dem conjux violaverat. Postquam  
enim eam adegit, ut sua manu stran-  
gularet adulterum, in cubiculo, cui  
eam inclusit, suspendit cadaver, ut  
ejus aspectu & horribili fœtore ene-  
caretur; quod & factum est. Judi-  
ca igitur, quanto melius modum se  
vindican- di inventura sit divina ju-  
stitia, cujus intentiones omnes infi-  
nitâ quâdam rectitudine diriguntur,  
& non minore sapientiâ. Suspen-  
det illa corpus omnis delicti ante  
oculos animarum Damnatarum, vo-  
létque ut hæc nunquam non contem-  
plentur suam stultitiam, vivámque  
semper in ipsis, servabit cognitio-  
nem, & memoriam perfidiæ earun-  
dem. *Statuam contra faciem tuam. Psal.*  
*49. Non ut corrigas, sed ut erubescas. Aug.*  
*16. Dixi præterea quòd contempla-*  
*turæ sint flagitia sua, qualia sunt in*  
*se. DEUS enim communicabit cum*  
*illis*

illis cognitionem & notitiam, quam ipse habet: unde talis apparebit ipsis sua culpa, qualis DEO; nimirum ut abyssus omnis turpitudinis & malitiæ; & nullo modo apparebit ut nunc, malum nullius momenti. *Tunc confusio respiciet æstimationem DEI. S. Th. q. 87. suppl. a. 1. ad 4.* Sic ut miseri contemplantes parte unâ regulam omnis bonitatis, quæ est voluntas DEI; alterâ verò parte repugnantiam non flectendam, quâ ipsi dissident ab illa regula, tali oppositione summam sibi calamitatem sint fabricaturi. *Posuisti me contrarium tibi, & factus sum mihi metipsi gravis. Job. 7. v. 20.* Et licet æternum deploraturi sint suas iniquitates, nunquam tamen cum illo redibunt in gratiam aut concordiam: nec enim in iniquitatibus illis displicebit aliud, quam quod placet DEO, hoc est pœna: & placebit illis quod DEO displicet, nimirum culpa. *nunquam recto, pravôq; conveniet: hæc enim sibi invicem adversantur.* *Aut S. Bernardus l. 5. de Consideratione.*

fid. c. 11. O igitur conditionem miseræ infinitæ, semper cognoscere malignitatem peccati, & semper tamen illi locum dare! dolere semper de admissio scelere, & semper scelera sceleribus cumulare! *Superbia eorum, qui te oderunt, ascendit semper. Psal. 73.* Ad istam æternam, & infructuosissimam pœnitudinem, ô Peccatores, vestra vos deducit iniquitas: & nihilominus pro eo, quòd ab hac via recedatis seriâ & utili pœnitentiâ, semper in ea progredimini aliis & aliis novis peccatis. Quid dicam vobis? Non suppetunt mihi verba quibus exprimam hanc omnis sensûs expertem stoliditatem, quòd homo etsi tantâ curâ & sollicitudine fugiat mala momenti nullius, quærat nihilominus incredibili temeritate pericula tam horrenda. An naturam forsan mutavimus, ubi agitur de salute & æternitate? O Dæmon execrande, ubi tu reperisti veneficium tam potens, ut omnem judicandi facultatem Peccatoribus auferas?

Care

Care mi Lector, imprime characteribus non delendis memoriæ tuæ has voces : *Respice finem.* Non respice modicum illud dulcedinis, quod secum fert peccatum, sed respice pœnitudinem illam sempiternam, quæ sequetur peccatum in Inferno. *Respice, respice finem.*

*Occasiones bonæ neglectæ.*

### III.

**C**ONSIDERA tertiam plagam, quam in Damnatis efficit Vermis Conscientiæ, & est, angustia quædam inexplicabilis ob neglectas tam egregias occasiones salutem consequendi; cùm tamen tunc non appareat vel unica, propterea quòd juramento DEI, cujus vita finem nullum habebit, stabilitum sit, nunquam amplius venturum tempus, quo præteritæ negligentiae mederi liceat. *Juravit per viventem in secula seculorum, quia tempus non erit amplius. Apoc. 10. v. 6.* Hoc est, quod ponderosissimâ desperatione ex miserorum cordibus incon-



inconsolabilem planctum exprimit :  
*Torquet angustia : Tempus non erit amplius.*  
Ingemuit quondam tam flebiliter, ut  
vel saxa ad miserationem movere po-  
tuisset, vox quædam, quæ à certa  
Anima profecta aures viri Religio-  
sissimi perculit : à quo interrogata  
quæ esset, & doloris ejus causa? re-  
spondit : Sum anima damnata, & de-  
fleo cum sociis meis supra omnem  
aliam calamitatem tempus amissum,  
quod in æternum non redibit. (*Dre-  
xel. de Damnata. Rogo c. 3.*) O igitur  
pretiosum tempus, & tam malè ni-  
hilominus impensum in ludis, amo-  
ribus, colloquiis, oblectamentis,  
peccatis! Tu eris vipera illa omnium  
sævissima, quæ cor nostrum vene-  
no inficiat, ubi miseros damnari con-  
tingerit! quo pretio & conditionibus  
non redimeremus dimidiam horu-  
lam, quâ veniam peteremus à DEO,  
coram Sacerdote nos accusaremus,  
voluntariis pœnis maceraremus no-  
strum corpus? Si fieri posset ut finem  
acciperet æternitas, contenti esse-  
mus

mus unam integram transigere in cruciatibus duplicatis ad impetrandam dimidiam hanc pœnitentiæ horam; & tamen tunc nullâ ratione fieri poterit, quod priùs fieri tam facile poterat. *Tempus non erit amplius.* Interim amisisse non sinistro aliquo & adverso casu, sed arbitrio proprio abjecisse talem tantûnque thesaurum, sine ulla spe illum unquam recuperandi, efficiet ut miseri tartarea rabie pessimè precentur nunc DEO, quem oderunt tanquam inimicum; nunc Dæmonibus, quos execrantur ut proditores; nunc Sodalibus, qui ad malum duces fuerunt, nunc super omnes reliquos sibi ipsis, qui apertis oculis præcipitare se voluerint in illam abyssum tormentorum. Ah stultum, dicet quilibet, ah miserabilem me, quem non piguit momento spurcæ voluptatulæ permutare æternitatem cruciatuum! an non id inculcabant Confessarij, non ingeminabant libri pij, non me certum reddebat Fides finem peccati esse

esse damnationem æternam? Ego insensatus, ego bellua execrabilis nolui aperire oculos ad bonum meum, sed deliberata voluntate æternum perire volui! Fuit cùm Deus me vocabat tot inspirationibus, me hortabatur tot vocibus, me provocabat tot promissis, terrebatur tot minis; & ego ad hæc omnia absurdi. Nunc etsi orem, etsi agam omnia, etsi mare integrum lacrymarum profundam, non obtinebo tamen illud bonum, quod unicâ quondam lacrymulâ impetrare potuissem: erit semper ferreus & inexorabilis DEUS, qui tantopere olim meas miseras miserabatur, ut sæpius lacrymas idcirco profuderit. Utinam saltem mortem hîc aliquam invenire esset, quæ finem tantis malis afferret! erit autem mors quidem pro tormento, sed non qualem miseri optarent pro refrigerio: Occidente pœnâ, vivificante sententiâ. Eus. Emiss. l. 1. ad Mon. Et idcirco aliud tibi non supererit, quàm admordere, & devorare præ dolore linguam, quæ  
sola

sola in tuo manebit arbitrio: *Man-  
ducaverunt linguas suas præ dolore. Apoc. 16.*  
Ante Mundi cataclysmum quidam  
DEI Servi ut nunciarent Peccatori-  
bus imminens illud malum, incul-  
plerunt marmori suum vaticinium:  
nec tamen fides ipsis est habita, donec  
ruptis cæli cataractis omnes denique  
suffocati fuerunt iniqui *Berosus l. 1.*  
*apud P. Pereiram in Gen. l. 8. in Præf.*  
*n. 3.* Ego non desistentibus peccare  
denuntio diluvium, sed ignis sempi-  
ternum; tempestatem perpetuam  
malorum omnium: & meam de-  
nuntiationem non marmori, sed his  
foliis incido. Faxit bonus DEUS ut  
fidem inveniam antequam prætereat  
tempus evitandi tam immane sup-  
plicium!

## Oratio.

*Ad Angelum Custodem pro im-  
petrando auxilio ad evitandum  
Infernum.*

**O** Sancte Angele, cujus manibus  
singulari DEI mei providentiâ  
jam

jam inde à primo, quo lucem aspexi, momento commissus sum, quando unquam, quantas debeo, gratias tibi agere potero propterea quòd toties me liberâris ab Inferno, quoties cavisti ne morerer in peccato! Quàm multa insuper admissem alia peccata, nisi tuæ obstitissent inspirationes? & quoties mihi iisdem in peccatis animam extorsisset malus Dæmon, si tu Protector meus, ad omne bonum meum tam sedulò excubans, tuâ mihi caritate non adstitisses, & divinam impedîsses Justitiam, ne me in illorum manus traderet? Vita mea noxarum suarum fœtore longè te fugabat à me, tu tamen noluisti recedere à cadavere putrido, sed patientiâ incomparabili instigâsti me, ut vitam emendarem, quò denique socius tuus esse possem in gloria. Hoc si contingat, polliceor sanè, me tunc æternas tibi acturum gratias; sicut jam nunc incipio ex corde: interim tamen quæso ne fatigeris, ô dux vitæ meæ, & in hac pere-



peregrinatione fidus anteambulo;  
perfice opus tuum, introduce me in  
beatam illam patriam; libera me ab  
hoc inimico crudeli, qui dies noc-  
tisque circuit, ut me devoret. Oro  
te per omnem illam obligationem,  
quâ devinctus DEO es, & ejus in-  
finitæ Bonitati, ex eo quòd non per-  
miserit, ut caderes cum Angelis Re-  
probis, sed te custodierit cum Ele-  
ctis; custodi me quoque fortiter,  
animos, robur, & vigorem suggere.  
Voca in subsidium, tuum, & meum,  
Principem Militiæ cælestis Sanctum  
Michaëlem, ut iterum præcipitem  
agat in abyssum Dæmonem istum  
perduellem, qui semper me impu-  
gnat. Voca Angelos Sanctos omnes  
socios tuos, dum mecum agitur de  
summo negotio: agitur de Gloria  
DEI; agitur de servandâ animâ ma-  
nibus tuis creditâ; agitur de explen-  
do desiderio Servatoris mei, qui  
tanta in me caritate fertur, ut para-  
tus sit, mortem denuo pro salute mea  
obire. Mihi parte mea fixum ra-  
tum;

tūmque est nunquam recedere à ductu tuo, sed semper pendere à te; & spero hoc medio effugere damnationem æternam, & venire tecum ad possidendum & laudandum DEUM nostrum per secula seculorum. Amen.

## Consideratio VI.

Pro die Veneris.

### DESPERATIO.

*Propter Extensionem pœnarum.*

I.

**C**onsidera, quòd homo in hac vita ferre potest multa mala, non potest tamen simul ferre omnia; hîc enim malum unum medetur alteri, & nonnunquam duo venena unū conflant alexipharmacum. At in Inferno alia evenient omnia; pœna ibi una manum alteri porriget, & Dam-nati erunt tanquam totidem vasa plena usque ad sumum irâ DEI. *Vasa iræ: Rom. 9.* Sicut enim in Cælo res omnes ac singulæ erunt materia gaudij, sic in abyssu illa, omnia ac singula, teste S.

D

Th.

Thoma in 4. *distin.* 50. q. 2. *artic.* 2. erunt materia tristitiæ : nec ibi quidquam deerit, quod infelicissimam reddere possit animam, ad hoc, ut miseria Reproborum ex omni parte completa sit; sicut in cælo omni ex parte perfecta erit Beatitudo Electorum. Hunc in finem colliget DEUS omnes pœnas ac supplicia in fascem unum, ut eum imponat in humeros illorum infelicitum perduellium, & fulmina omnia Armentarij Justitiæ suæ vibrabit, ad eos percutiendos ex omni parte, & nihil in iis absque peculiari sua plaga relinquendum: *Congregabo super eos mala, & sagittas meas complebo in eis.* Deut. 32. Sufficeret solus ignis ad eos infelicissimos constituendos; in eo enim Dammati habebunt plus fine comparatione doloris, quàm ex omnibus laniensis, quas unquam excogitare possent aut homines, aut Dæmones; cùm ille sit inventum DEI. *Preparata est enim Tophet, à Rege preparata, profunda, & dilatata; nutrimenta ejus ignis, & flatus Domini sicut*

*torrens sulfuris succendens eam. Isa. 30. v. 33.*  
Nihilominus plus adhuc meretur eorum perversitas : & sicut membris omnibus , & omnibus facultatibus abusi sunt ad peccandum , ita in membris omnibus in omnibus facultatibus digni sunt puniri tot doloribus , ut Propheta eos existimârit innumerabiles : *Quis poterit præ timore iram tuam dinumerare ? Psal. 99.* Idcirco præter id, quod hætenus consideratum est circa sensus externos, facultates internæ, ut perfectiores, ita & doloris multo magis capaces, magis etiam cruciabuntur. Facultas imaginatrix semper affligetur imaginibus terribilibus; & si quis atrâ bile laborans, cui quis hac in vita obnoxius vivat, diu noctûq; funesta sibi intus simulacra objicit, quid fiet malis omnibus conspirantibus? quando Damnatus videbit supra se cælum clausum, infra se ignem inextinguibilem, circa se Diabolos intolerandos, intra se pœnas consolationem omnem respuentes? Appetitus

titus sensûs perpetuo velut fluxû & refluxu agitabitur, imò tanquam in continuo naufragio tædiorum, agoniæ, tabiei, angustiarum, expositus ictibus omnibus Justitiæ divinæ, quin vel ab uno tueri se possit. O DEUS! si gutta una aquæ assiduò destillans in saxum durissimum, tamen illud excavat, quid efficiet in infelicibus animis diluvium æternum malorum omnium, velut stipendio conductorum ad vindicandas injurias illatas Conditori? *Pluet super illos bellum suum. Job. 30.* Intellectus eorum plenus erit horribilibus tenebris internis, plus quàm plenus sit tenebris externis eorum carcer, & omnium quæ olim noverant, memores non erunt, nisi quantum servient ad eos ampliùs excruciandos. *Nec scientia erit apud inferos. Eccl. 9.* Magni nominis Doctor Parisiensis, cùm Episcopo spectabilis appareret, falsus est, se in Inferno jam aliud nescire, quàm quòd damnatus sit, & quod nunquam ullo bono sit frutur.



turus. Voluntas in sua malitia erit obstinata, sic ut per omnem deinceps, quanta quanta erit, æternitatem, ne minimum quidem erga bonum ullum honestum affectum sit expertura; quin imò semper peccata peccatis accumulans, quanto magis est depressa à DEO, tanto magis se contra eum attollens odio ac superbiâ, miseriam & calamitatem suam retinebit æternam. *Quid tam poenale, quàm semper velle, quod nunquam erit; & semper nolle, quod nunquam non erit?* Aiebat S. Bernardus l. 5. de Consid. c. 12. Desiderabit siquidem Anima semper aut oblectamenta, aut vindictam; & suo desiderio potiri nunquam poterit. Odio habebit semper Justitiam & supplicium; & nec hoc, nec illâ carere unquam poterit. *In æternum non obtinebit, quod vult; & quod non vult, in æternum nihilominus sustinebit.* id. ib. Si misella humiliare se posset sub potenti manu DEI, osculari illam dextram, quæ tam justè ipsam flagellat, mitigaret dolores suos;

sicut illos mitigant Sanctæ illæ animæ purgantium ignium ergastulo clausæ: at proterva semper majoribus furiis agitur, & bufonis instar inter ictus cum veneno rabiem gemit: redit identidem ad evertendum decretum divinum, & semper frustra conatur; cùm vellet evitare pœnam absque eo quòd abhorreat à culpa: & quia perturbationes omnes sine freno sunt, omnes se cum Anima conjungunt ad novum assultum, & omnes semper infinito cum dolore repelluntur. *Nunquam rectio pravòq; convenit. Bern l. 6.* Qualis proinde erit infelicium illarum creaturarum desperatio in æterna repulsa cujuslibet earum desiderij, quando videbunt, quòd omnibus seculis post tot pœnas ac supplicia DEUS ipsis ne guttulam quidem leniminis sit concessurus? En finem, ad quem perducit spes falsa peccantium, operandi semper malè, & habendi semper benè; perseverandi in peccatis usque ad mortem, & accipiendi pro-

mer-

mercede salutem; multiplicandi Ser-  
vatori suo semper nova vulnera; &  
expectare semper tanquam ex arbo-  
re vulnerata balsamum benignitatis.  
*Filij non semines mala in sulcis justitiæ, &  
non metes eam in septuplum. Eccl. 7. v. 3.*  
Hoc est consilium, quod divina tibi  
misericordia suggerit. Non semina  
peccata, & non metes supplicia mul-  
tiplicata. Cura igitur ut in rem tuam  
ista veritas: spes enim quæ multipli-  
cat iniquitatem, desinit tandem in  
æternam desperationem.

*Propter Intensionem earundem.*

II.

CONSIDERA, jure ac merito Infer-  
num ab infelici illo Divite ap-  
pellatum esse, *locum tormentorum*: ipse  
enim centrum est malorum omnium.  
Quare sicut res, quæ in centro suo  
sunt, fortiores quàm ullo alio loco  
sunt, vimque agendi habent, quàm  
habere possunt maximam: sic mala,  
quæ in Inferno erunt, non erunt so-

lùm numero innumerabilia, sed etiam supra omnem comparisonem intensa & pura. Ibi imprimis pœnæ nihil habebunt, quod cum ipsis pugnet, easque leniat, sed erunt meræ pœnæ sine mixtura ullius solatij, perinde ac in cælo gaudia, mera erunt gaudia sine mixtura ullius tristitiæ. Insuper ipsa ibi bona mutabuntur in mala. Societas, quæ alibi miserrum solatium est, ibi summæ erit molestiæ: lux quæ alibi tam pulchra est, ibi plus quàm ipsæ tenebræ odio habebitur: cognitio quæ alibi suâ scientiâ oblectat, ibi plus cruciabit quàm ipsa ignorantia; sic ut mors, quæ ceteroquin omnium terribilium terribilissimum est, in illa rerum omnium perturbatione omnium votorum summa futura sit. Hac in vita dolores aut non sunt longi, aut non sunt vehementes: natura enim aut illis assuefit, aut illos vincit, aut cadit sub onere & extinguitur. *Brevis morbus alterutrum facit, aut exstinguetur, aut exstinguet.* Sen. Ep. 78. At in Infer-

no leges cum his omnino pugnan-  
tes sunt; cum ibi dolores uno eo-  
demque semper in statu futuri sint,  
intolerandi intensione, interminabi-  
les duratione; nec tempore lenius  
fiet pati, nec tempore consumentur  
patientes. *In Inferno nulla est Redem-  
ptio.* Ibi sicut nihil est moderatum  
in lanienis, ita nihil est quietis in reis,  
qui semper eodem modo non tan-  
tum vivi, sed vivaces conservantur,  
ut sentiant suam miseriam, nec vel  
momento temporis eam valeant de-  
clinare. *Ut urantur, & sentiant usq<sup>3</sup> in  
sempiternum.* *Jud. 16. v. 21.* Sic exigit  
Majestas divina contempta à Pecca-  
toribus: sic postulat Sanguis Chri-  
sti JESU conculcatus; sic cælum  
spretum, & posthabitu stercori.  
Divina Justitia, quæ nutrix est & re-  
paratrix honoris divini, ulciscendas  
sibi sumit istas injurias, séque qua-  
lis est cognoscendam præbet: *Cogno-  
scetur Dominus judicia faciens.* *Psal. 9.* Sic  
ut miseri illi, qui tam malè cogno-  
verunt DEUM, & quem nunquam



visuri sunt, cognituri illum sint ex gravitate ictuum, qui toto in eos pondere incumbent; & quasi sensibus eum percepturi in vulneribus, quæ in Animabus ipsorum quodammodo sculpit. Interim persuadere tibi potes, Lector mi care, quòd, si pœna ullius illorum miserorum divideretur inter omnes, qui in terris degunt, mortales, suffecturum esset id, quod cuique obveniret, ad mortem illi majori cum cruciatu inferendam, quàm ullus unquam reus exantlârit: & hinc argue, qualis futura sit desperatio, quam unica animarum damnatarum experietur; quæ suâ culpâ inveniet se vivam sepultam æternum in doloribus tam omnem mensuram excedentibus. Sicuti Nobili delicato in pœnam excessum admissorum nascitur intra viscera lapillus, ferre non potest unam illarum punctiõnum, fremit, in lecto se serpentis instar conglomerat, damnat sortem suam, & ipsa etiam lenimina fastidit. Et tamen lectus est

est plumeus, cubiculum tepidum, amici consolantur, Medici spe recreant, remediis sublevant, Uxor servit magno amore, domus tota diu noctuque occupata est in malo leniendo: & ille aliud non patitur, quàm levem vellicationem in parte minimâ corporis, ceteroquin integrâ ac sani. Isto quid jam fiet quando damnatus sepelietur in abyſſo ignis, tenebrarum, fœtoris, percussus in omni parte corporis, & in tota sua anima omni genere malorum? *Omnis dolor irruet super eum. Job. 20. v. 22.* Et ibi inter execrationem sociorum tam exorum, inter ictus & illusiones Dæmonum tam crudelium, inter clamores tam multorum punitorum sine solatio, sine spe, cogetur omni momento pati mille mortes. Istas veritates post tot argumenta, quæ nobis illas affirmant, non credere, extrema dementia est: judicatu, quæ dementia futura sit, illas credere, & tantùm non semper vivere in peccato: hoc est, vivere tam

procul ab illo barathro, quàm procul est mortuus à tumulo: siquidem non minùs debetur Peccatori, sepeliri in illa abyſſo, quam debeatur cadaveri, abjici in ſepulchrum. Magna res eſt, quòd noſtra malitia adegerit DEUM tam bonum ad fabricandum locum talium tantarùmque pœnarum, ut ipſi Peccatores obtemperarent, ipſum amarent. Sed quanto eſt mirabilius, quòd etiam poſtquam tot pœnarum locum eſt fabricatus, tamen ipſum Peccatores non ament, ipſi non obtemperent?

*Propter comparationem cum  
Gloria.*

### III.

CONſidera, ultimum complementum Deſperationis Damnatorum formatum iri ex ipſa Gloria Electorum in cælo. Elevans oculos ſuos, cum eſſet in tormentis, vidit Abraham à longè, & Lazarum in ſinu ejus. Luc. 16. v. 23. Hic aſpectus crudeli antiperiſtaſi exacer-

acerbabit tormenta illorum infelici-  
cium, qui pari ferè odio ferentur in  
miseriam propriam, & summam fe-  
licitatem alienam. Nam etsi DEUM  
nunquam viderint, tamen pro ma-  
jori suo tormento impressam habe-  
bunt animo cognitionem vivacissi-  
mam magni illius boni, quod in  
æterna ejus possessione consistit; &  
hæc ipsa cognitio clarior fiet ultimo  
Mundi die, quando intuebuntur  
gloriosam Christi JESU humani-  
tatem, quæ ipsis erit terrori incom-  
parabili, simulque per ipsum tan-  
quam opus DEI omnium maximum  
apprehendent insuper magnitudi-  
nem Majestatis divinæ, & quod  
consequens est, Beatitudinem Præ-  
destinatorum, quâ hi æternum fru-  
entur. *S. Tho. quod l. 8. q. 7. num. 17.*  
Parte alterâ Invidia, sicut omnia alia  
vitia spiritualia, in Damnatis erit ve-  
hementissima, & hæc alterum quo-  
dammodo Infernum in his malè for-  
tunatorum cordibus efficiet: *Dura*  
*sicut Infernus amulatio*; dum ipsis in  
tor-

tormentum vertet, quidquid boni possident Sancti, & faciet ut infinita rabie illos desiderent habere socios suorum tormentorum. Judæis ex eo solùm, quòd se S. Stephano in inita disceptatione inferiores fuisse viderent, disrumpebatur cor & viscera, fremebântque contra eum: *Dissecabantur cordibus, & stridebant dentibus in eum. Act. 7. 54.* Unde facile erit colligere qualis futura sit rabies Reproborum, quando memoriæ occurreret inexplicabilis triumphus Electorum. Enimvero si pœna hæc non esset futura acerbissima, Sacrae Litteræ non toties ejus, ad terrorem nobis incutiendum, meminissent. S. Joannes in Apocalypsi sua asserit, Reprobos torquendos diu noctûque in conspectu Angelorum Sanctorum, & Christi Judicis: *Cruciantur igne & sulfure in conspectu Angelorum Sanctorum, & ante conspectum Agni. Apoc. 14.* S. Paulus affirmat, eum qui non obedierit Evangelio, luiturum suam temeritatem supplicio æterno ante



faciem omnipotentis DEI. Qui non obediunt Evangelio, pœnas dabunt in interitu æternas à facie Domini. 2. Thess. 1. 8. Id quod duplici modo verum est, dum & Sancti pœnas Reproborum in Divinitate tanquam in speculo contemplabuntur; & Reprobi in sua calamitate agnoscent gloriam Sanctorum, sicut æger aliquis bonum sanitatis in propriis suis miseriis dignoscit. Sic & Isaias ostendit, unum ex acerbioribus tormentis, quæ scelerati in pœnam noxarum suarum passuri sint, fore, emori fame, mœrore, afflictione sub illud ipsum tempus, quo boni satiabuntur æterna satietate oblectationum, & exultabunt omni momento propter redundantem gaudiorum suorum multitudinem.

*Faciebatis malum in oculis meis, & quæ nolui elegistis, propterea ecce servi mei comedent, & vos esurietis: ecce servi mei latrabuntur, & vos confundemini: ecce servi mei laudabunt præ exultatione cordis, & vos clamabitis præ dolore cordis, & præ*  
con-

*contritione spiritûs ululabit. c. 16.* Maxime quia non tantum cognoscent, quod Sancti fruuntur infinitis deliciis, dum ipsi fremunt inter immensa tormenta; sed cognoscent insuper, quod DEUS cum Beatis gaudeat & exultet de ipsis eorum pœnis, propter gloriam, quæ ex damnatione Peccatorum in divinam Justitiam redundat. Istud enim vero infelicibus illis dolebit intimè; debere ferre tot cruciatus in æternum, & debere eos ferre in conspectu Judicis sui, & æmulatorum suorum, quos extremè oderunt; & debere eos pati cum tanto incremento felicitatis ipsorum, cum ipsi debeant esse quodammodo victima Sacrificij perpetui, consumpta, quin tamen unquam consumatur, in honorem Altissimi. Et tamen ita res habet: Si ergo miserrimus æternum pereor; tu verò, mi Lector, salutem consequeris, tu semper de meis tormentis gaudebis, & ego semper torquebor de tuo gaudio; & vicissim si ego beatus evasero, & tu æternum

infelix, ego semper ridebo tuam calamitatem, non ut malum tuum, sed ut bonum DEI suas injurias vindicantis. *Letabitur justus cum viderit vindictam; manus suas lavabit in sanguine Peccatoris. Ps. 57* Qualis autem obsecro erit ista desperatio, non solum inter tot mala nihil recipere lenimenti, sed insuper hostium summè exorum felicitatem suis malis augere? Impius Apostata Julianus manu non aspectabili vulneratus, sanguinem, quo manum impleverat, cælum versum projecit cum blasphemio convicio: *Saturare Nazarene, vicisti.* Quales ergo erunt blasphemiae, imprecationes, odium erga Deum, & quemlibet è Sanctis ejus, qui non tantum vulnerat, sed lætatur, sed se, ut ita dicam, exornat infami sanguine illorum perduellium? Interim, si omni ex urbe unus solus, & singulis seculis deberet in illam abyssum abjici, & desperabundus fremere, quemlibet nostrum par esset cohorescere, tam horrendum malum est, æternum damnari: & scimus tamen

multos quotidie eò ruere præcipites,  
*Multi sunt, qui intrant per eam. Matth. 7.*  
 Et pergimus tamen securi vivere in  
 peccato, hoc est, non formidamus  
 ambulare per viam, cujus terminus  
 est illud irreparabile præcipitium! O  
 te parentem infelicem, qui genuisti  
 unum eorum monstrorum, quod  
 æternum peribit! O Matrem mise-  
 ram, quæ talem abortum lacte tuo  
 nutrîsti! O Matrimonium calami-  
 tosum, quo mediante lucem aspexit  
 æternus DEI inimicus! Sed multo  
 miseriores, multo infeliciores & ca-  
 lamitosiores te, qui ante experiri  
 vis cruciatus istos, quàm credere! *Væ*  
*quibus prius experienda sunt ista, quàm*  
*credenda! Eusf. Emyss. hom. 1. ad Monach.*

## Oratio.

*Ad Sanctos Patronos ut impetrent  
 nobis gratiam Salutis consequendæ.*


**O** Sancti mei Protectores, ex om-  
 ni Cælitum numero à me lecti,  
 pro singulari fiducia, quam de ve-  
 stro

stro patrociniò concepi, vos non habetis porro quod metuatis, cùm jam in portu stet vestra navis; tamen pro vestra in me summa benignitate solliciti estis de me, quem videtis adhuc jactari cum tanto periculo æternùm pereundi. Et sanè est cur sitis solliciti, dum toties vobis inspectantibus spontaneum naufragium passus sum, quoties peccavi. Et ubi nunc ego essem, si benignissima Servatoris mei manus me non sustentasset, ne mergerer, & nisi vos tam studiosi salutis meæ non impetrassetis mihi spatium pœnitentiæ, & tempus emendationis? horreo, dum cogito, & tamen tam parum capio de meo discrimine: quid ergo dicetis vos, qui cognitione tam perfecta metimini fundum abyssi illius infernalis, quæ me erat absorptura? Tam multas igitur vobis gratias rependo, quàm multa sunt momenta illius vitæ, quæ vestris precibus mihi concessa fuit, ut seriò me pœniteret: rogòque vos præterea per  
illam



illam ineffabilem Bonitatem DEI mei, qui ab æterno elegit vos amicos suos, & hæredes Regni sui cælestis, ne fatigemini iniquitatibus meis, sed vincatis duritiem meam efficacîâ precum vestrarum, & obtineatis plenam præteritorum delictorum meorum veniam, cum abundanti gratiâ, moriendi potiùs, quàm ad vomitum peccati redeundi. Hac nixus spe ego vos hodie eligo testes illius pacis, quam cogito stabilire, & in æternum conservare cum DEO meo; protestando coram vobis, quòd abhorream extremè horribilem meam ingratitude, & diabolicam temeritatem, quâ illum tam graviter offendi, & profitendo palàm, quòd si iterum offendere eundem deberem, eligerem potiùs confestim in nihilum redigi, quàm tam immanem illi porro inferre injuriam. Interim vos, qui nunc testes estis mei decreti, facite vos Advocatos perpetuos, & obtinete mihi vires ad vincendos vestro exemplo hostes  
meos

meos Mundum, Carnem, Dæmonem, ut vobiscum semper in Cælo triumphem. Amen.



## Consideratio VII.

Pro die Sabbati

ÆTERNITAS POENARUM.

*Est Interminabilis.*

I.

**C**onsidera; Pœnas Inferni, quamvis essent levissimæ, ex eo tamen, quòd finem nullum sint habituræ, evasuras infinitas. Quid ergo erit, cùm & atrocitate sint intolerabiles, & simul æternitate interminabiles? Quis potest capere, quantum ponderis accedat dolori ex eo, quòd finem non sit habiturus? Cruciatu unius horæ magnum malum est: duplex malum est cruciatu horarum duarum, & centuplicatum ma-

malum est cruciatus centum horarum, atque ita progrediendo, quò pœna durat diutius, tanto evadit magis formidanda. Illa igitur Pœna, quæ durat horis, diebus, seculis infinitis, profectò est malum infinitum, & omnem nostrarum in concipiendo cognitionem superat. Hinc si hæc daretur Damnatis optio, ut vel tolerarent æternùm punitionem Apis in aliquo oculorum, vel tolerarent omnes cruciatus Inferni tot seculis, quot sunt in cælo stellæ, eligerent procul dubio esse ita miseriam tam longo decursu seculorum, & subinde videre finem ejus doloris, quàm tolerare malum tanto minus, sed absque fine. Breve est, contemni potest, quidquid æternum non est; quia per totam æternitatem erit nihil. *Quid enim potest grande esse, quod habet finem?* *Ait S. Hieronymus in Ps. 89.* *V. Cornel. in Epist. 2. Petri c. 3. v. 8.* è diverso quod finem non habet, sicut comprehendi non potest, ita non potest non timeri, nisi ab insano. Hoc idcir-

idcirco pessimum, quòd sicut malum culpæ, ita & malum pœnæ non masticetur, sed devoretur à Peccatoribus. *Os impiorum devorat iniquitatem. Prov. 10.* Et si hoc ita est, applicemus tantisper animum ad metiendam hanc æternitatem, quæ mensuram non patitur. Accipe clepsydram illam, quâ horas metiris, quæ fluunt, & sic te ipsum alloqueri.

Si necesse esset me vivum hærere in medio ignis per tot millia annorum, quot sunt pulvisculi arenæ in hoc vasculo, quando unquam cruciatus meus finem esset habiturus? Tanto jam tempore duravit Mundus, & tamen nondum lapsa sunt sex millia annorum: nondum igitur ablati essent sex illarum propè atomorum, quæ vitrum hoc implent; & tamen si ego morior in peccato, fide certum est, postquam cruciatus fuero per omnia hæc sæcula, necdum tamen partem minimam supplicij mei esse præterlapsam, & æternitatem super-

superfuturam integram. Progrediamur igitur; & imaginemur montem tam vastum simili conflatum arenâ, qui à terra ad supremum usque cælum apicem porrigat, & dic: si me necesse esset vivum ardere in igne tot millibus annorum, quot arenæ pulvisculi hunc montem componunt, quando tandem finis futurus esset tormentorum meorum? & tamen si mori me contingat in peccato lethali, fide certum est, quòd post cruciatus tot seculorum decursu exantlatos, nihil adhuc pœnæ meæ elapsum sit, & æternitas tota atque integra sit superfutura. Agamus igitur hac ratione. Mons iste magnitudinis tam vastæ duplicetur tot vicibus, quot sunt arenæ maris, quot folia arborum, quot plumæ volucrum, quot squamæ piscium, quot pili animalium, quot atomi aëris, quot guttulæ aquæ. quæ hætenus lapsæ sunt, & deinceps cælo cadent usque ad Mundi finem: quæ unquam humana mens comprehendere

re



re poterit numerum tam magnum, cum vix illum comprehendat Intellectus Angelicus? & tamen si tu, si ego moriemur in peccato lethali, fide certum est, quod toto hoc tempore hæsurī simus in igne, quodque omnes isti anni elapsuri sint, quin tamen quidquam decedat nostræ pœnæ, aut æternitas vel unico momento decreseat. O igitur æternitas, ô æternitas! aut fide carent Peccatores, aut cerebro. Potésne tu negare, quod vivere in peccato non sit, esse constitutum in periculo præcipitandi in illam abyssum, ex qua exitus non patet per omnem deinceps æternitatem? Negare profectò id non potes, si Christianus es: quin imò dicere cum veritate potes, quamdiu ita vivis, te non nisi passu unico ab illa abyssu distare; quodque jam uno pede in illa hæreas: *Uno tantùm ut ita dicam gradu ego mórsg, dividimur.* 1. Reg. 20. Dum, sicut momento quolibet supervenire tibi mors potest, ita quolibet momento præceps

eò ruere potes. Exponere autem se manifesto periculo ardendi mille annis in igne pro vilissima & brevissima voluptatula, procul dubio valde stultum esset; stultius autem esset exponere se hac ratione periculo ardendi per decem annorum millia; multo iterum ac multo stultius per centum millia: exponere igitur se periculo pro re tantilla ardendi per omnem æternitatem, an non erit insania infinita? *Post tantillam voluptatem tam gravis miseria: Bern. ad fr. de Monte DEL.* Tu dicis: cogitationem feriam & attentam de æternitate, posse hominem redigere ad insaniam. Erras: cogitatio ejusmodi potest amentes ad mentem revocare.

*Est inevitabilis.*

## II.

**C**ONSIDERA, quòd si ista perpetua successio seculorum in Interno posset admittere aliquod lenimen ex varietate, futura esset tolerabilior: at quomodo tolerari poterit, cùm eadem

dem semper & immutata esse debeat in tormentis? Manna in deserto etsi omnem contineret varietatem saporis, nihilominus nausæ cœpit esse Populo Hebræo, quia semper erat idem. *Nihil aliud respiciunt oculi nostri nisi Man. Num. 1. 6.* Factum autem est hoc Populi murmur secundo itineris per desertum anno, ut Interpretes volunt: *V. Cornel. ib.* Quid igitur futurum fuisset post annos quadraginta, post seculum integrum? Infelices Peccatores! Æternitas illa, quæ vos expectat, si vos vocaret ad convivium cum iisdem semper ferculis, talem sui nauscam moveret, ut vos impelleret ad desperationem. Qualis igitur erit vestra desperatio, dum vos expectat æternitas in loco omnium tormentorum, semper eadem cum iisdem cruciatibus? Vos, quibus molesta est concio non varia, imò & Comœdia, quæ caret episodis, quomodo tandem transigetis æternitatem in iisdem miseriis, sine lenimine, sine mutatione, sine re-

focillatione ? Qui Zonæ torridæ subjecti sunt, diurno tempore rectis Solis radiis non parum aduruntur ; nox illis calores plurimum mitigat. Æger aliquis dormitat saltem tantisper, & tunc omnium suarum molestiarum obliviscitur : nec est vel animi, vel corporis vulnus ullum tam doloriferum, quod tempore non mitigetur. At pro Dam-natis spes istæ omnes vanæ sunt: subjecti erunt non radiis, sed fulminibus divinæ Justitiæ, nec veniet unquam aut nox, aut somnus, aut tempus, quæ vulnera eorum mitigent. Atque utinam saltem miseri decipere possent seipsos, & sibi persuadere, venturam aliquando illam mitigationem, etsi reipsa ventura nunquam sit ! Sed ne istud quidem possunt: vult enim DEUS, ut perpetuò eorum oculis obversetur sententia æternæ damnationis, characteribus exarata, quos nec æternitas deleat, quin ab ea vel tantillum animum aliò avocare possint: *Ut videant semper.*

*Dan. 11.* Hinc si cuilibet una hora in doloribus dies videtur, quàm longæ infelicibus videbuntur miseriæ, nunquam per infinita secula interpolatæ? non solùm patientur miseri per æternitatem, sed ipsam patientur æternitatem; cùm enim hæc semper ante mentis oculos constituta sit, identidem eos toto suo pondere opprimet, eâ omnino ratione, quâ sphaera immensa ex ære totâ suâ mole perpetuò opprimet planum, cui insistit. Quid quòd sæpè plus affligit timor mali imminentis, quàm ipsum in se malum: *Pejor est bello timor ipse belli*: & idcirco dicere oportebit, quòd non solùm æternitas quovis momento Damnatum oppressura sit, sed quòd momento quolibet mutatur in plures æternitates: *in perpetuas æternitates*. Nam si malum est inevitabile, & expectatio certissima, necesse est ut timor omni carnifice savior anticipet & duplicet cruciatum quovis momento. Tu legendo cohorrescis; & tamen non



horres peccare? si ita est, horres præcipitum depictum, & non times te præcipitem agere in verum.

*Est Justa.*

### III.

**C**ONSIDERA, homines dum semper ad rationis humanæ libram ponderare volunt omnia, nonnunquam hære attonitos, quòd DEUS brevi hominis culpæ decreverit pœnam ignis sempiternam: id enim ipsi neque cum divina Bonitate, tam nostram imbecillitatem miserari solitâ, neque cum divinâ Justitiâ, quæ in puniendo modum tenet, in animo suo conciliare possunt. Non tamen est miranda hominum hujus seculi admiratio, quæ tota fundatur in ignorantia rerum spiritualium. *Animatus homo non percipit ea, quæ sunt spiritus DEI: stultitia enim est illi, & non potest intelligere. 1. Cor. 2. Si Peccatores assequerentur malitiam peccati sui, mox istum stuporem suum mutarent stupore*

pore alio magis insolenti. Nunc stupent, quomodo DEUS culpæ uni soli parârit Infernum æternum: tunc autem stuperent, cur non pro omni transgressione plures Infernos destinârit, & cumulum tormentorum septies atrociorum. Rectè hanc veritatem intellexit S. Augustinus, dum asserit, miseriam Damnatorum æternam esse, quia sic respondet malitiæ ipsorum. *Nunquam esset Dæmonum æterna miseria, nisi esset magna malitia. De Civit. l. 9. c. 13.* Perpende igitur, noxam quamlibet mortiferam, cum sit vel tacitus, vel manifestus contemptus voluntatis divinæ, esse injuriam DEI. Crescit autem omnis injuria ex duplici capite, magnitudine scilicet ac dignitate offensi, & vilitate offendentis: unde cum infinita sit dignitas & Majestas DEI, summa è diverso nostra vilitas, consequens est, ut injuria, quâ illum afficimus, sit quodammodo infinita; sitque abyssus malitiæ magis detestabilis, quàm essent infinitæ injuriæ il-

latæ creaturis infinitis. Quare cùm pœna respondere debeat culpæ ad reparandum ordinem violatum, debet ipsa quoque esse infinita, & quia non potest esse infinita in intensiōe, cùm ejus creatura capax esse non possit, necesse est ut sit infinita in extensiōe, & in omne ævum duret.

Hæc eadem veritas meliùs etiam cognoscetur, si consideretur, quòd malignitas peccati tam extra omnem orbitam vagetur, ut vinci non possit, nec pro ea fieri satìs omnibus operibus bonis rerum conditarum omnium, & quòd idcirco necessarium fuerit, ut ad satisfaciendum isti debito DEI Filius suis è venis divini sanguinis thesaurum appenderet tanquam pretium justum. *Less. de perf. div. l. 13. n. 183.* Jam malum, quod compensari non potest actionibus virtutum, quantocunque tempore exercitarum ab hominibus, rectè meretur pœnam omni tempore longiorem, & ideo æternam. Sic Magnus iste Dominus nunquam potest

test contemni, nisi ab insanis: cum si pœna debita ejus offensoribus aliquando finiretur, contemni posset à cujuslibet judicio & sententiâ: siquidem, *quod æternum non est, nihil est.* Quod per unam integram æternitatem nihil erit, etiam nunc pro nihilo reputari potest. Sic differit, quisquis per Bonitatem in DEO intelligit non stolidam aliquam non curantiam mali; ut stultè illam sibi fingunt Peccatores; sed per Bonitatem intelligit Sanctitatem infinitâ & illimitatâ quâdam ratione pugnantem cum peccato, quæque infinito odio illud prosequitur, quod non potest non prodere, sed debet vindicare ipsum pœnâ respondente, quæ nimirum finem nesciat. Atque ita etiam res ponderat, qui bilance utitur divinæ Justitiæ, quæ falli non potest, non autem ponderibus mendacibus mundi, decepti perinde ac decipientis. Perpende proin, Lector mi care, quàm prodigiosum malum sit noxa mortifera, dum suis quasi  
in

in visceribus continet æternitatem miseriarum ; sic ut si oculis mentis tuæ penetrare posses & pervadere in illum sinum profundum & malignum, videres intus semina æterni ignis, luctûs æterni, æterni carceris, æterni fœtoris, æternæ pœnitentiæ, æternæ desperationis, æternæ jacturæ omnium bonorum. Cuncta hæc uno in peccato continentur, etiam si tantillo tempore duret, sicut in ovo tam parvo Basilisci continetur tota venenatissima progenies, & in illa mors multiplex. Interim hoc est Infernus, aut ut rectius dicam, nihil horum est Infernus, sed malum infinities majus, quàm à nobis explicari possit ; & quod nihilominus toties geminabit suum rigorem, quàm multa sunt peccata, quæ Anima secum feret in illam terram miseriæ & tenebrarum, ubi umbra mortis, & nullus ordo, sed sempiternus horror inhabitat. *Job. 10. v. 12.* An tu unquam seriò cogitâsti de his veritatibus ? *Intellexisti hæc omnia ? Matth. 17.* Si cogitâsti, quomodo fieri potest, ut pro



tam turpi, tam brevi voluptatulâ peccando cum risu præcipites temet in illam abyssum culpæ, quam post se trahit sequelâ legitimâ? Ah! non intellexisti hæc omnia, non intellexisti. Cogitâsti obiter, sed non intellexisti. Quod si ne nunc quidem cogitas, quid agis tandem? Quid tu sopore deprimeris? surge invoca DEUM tuum. *Jona. i. v. 16.* Quomodo dormis in statu naufragij tam propinqui? cùm tamen malum, si verisimile duntaxat esset, & non fide certum, attonitum te deberet reddere omni momento. Age, nulla non die ora DEUM tuum, ut te liberet; propera ad Confessionem; horre peccatorum Societatem, fuge peccandi pericula; crebrò divinis Mysteriis utere; opera pœnalia exerce: exi, si necesse est, ex Mundo, ut serves Animam tuam. Tandem nunquam potest nimia esse cura, quæ ponatur in æternitate in tuto collocanda. Nunquam potest esse nimia securitas, ubi periclitatur Æternitas. Bern. apud P. LaZarum Dussier in Ser. Advent.

## Oratio.

*Ad Sanctissimam Virginem, ut  
aeternam nobis Salutem obtineat.*

**O** Mater pietatis benignissima, sicut nulla creatura propius refert perfectiones incomprehensibiles divini Filij tui, ita nulla ad ipsum propius accedit miseratione. Imitaberis ergo illum, qui est totus Caritas, totus miseratio erga Peccatores, si subvenies mihi misero in summa mea miseria, liberando me ex abyssu meorum Peccatorum, & à damnatione, quam tot titulis promerui. Scio quantopere etiam res tua agatur, dum agitur de Gloria ejusdem Filij tui, & quòd cupias, ut hæreditas Animarum ab ipso redemptarum sit copiosa, & fructus divinissimi Sanguinis ejus augeatur; & idcirco ad te omni cum fiducia confugio, cum sim certus, quòd non sis omissura preces tuas pro illo interponere, pro quo Dominus meus **JESUS** Christus ipsam aded vitam pro-

profudit. Quid me futurum esset, si damnerer ad ignes æternos, ad non videndam in æternum faciem tui & mei DEI; ad illum & te præterea, habendos pro inimicis? Ah! nunquam istud contingat. *A morte æterna libera me Domina.* O magna Domina, impetra mihi ut sim liber à tam tremenda sententia: nihil mihi & meis precibus tribuatur; nec enim dignus sum: sed totum detur precibus tuis & meritis, Vulneribus, & morti Servatoris mei. Tu nobis ab ipso ad Crucis pedem relicta es Advocata, & Mater: Da igitur veniam, ut sic te alloquar: Adimple partes tuas; *Monstra te esse Matrem*: resonet vox tua in favorem mei, & sufficit mihi: Impetra mihi ne unquam peccato mortifero me obstringam, sed fideliter ad extremum usque spiritum serviam meo Creatori, & Redemptori, ut frui illo possim in æternum, & cum omnibus Sanctis in Cælo compensare obsequia, quæ in hac vita tam ignavè omisi. Amen.

## I N D E X

## Considerationum.

*Consid. I. die Dominica.* Carceris Inferni Angustiæ, Tenebræ, Fœtor.

*Consid. II. die Lune.* Ignis Infernalis Qualitas, Quantitas, Elevatio.

*Consid. III. die Martis.* Societas Damnatorum, Dæmonum, Complicum in peccato.

*Consid. IV. die Mercurij.* Pœna Damni Infinita, Summi doloris, Debita Peccato.

*Consid. V. die Jovis.* Vermis Conscientiæ. Memoria gaudiorum præteritorum, Pœnitentia sera, Occasiones neglectæ.

*Consid. VI. die Veneris.* Desperatio propter Pœnarum extensionem, Intensionem, & earum comparisonem cum Gloria.

*Consid. VII. die Sabbati.* Æternitas Pœnarum Interminabilis, Inevitabilis, Justa.

A. D. Gl. & Animarum Salutem.

In proprio adipe fixæ libidines  
Cullicant, et inter sarlagines  
flammeas, miserabilia corpora  
crematurus.

S. Cypri. serm. de ascens.

post tantillam voluptatem  
tam grauis miseria. S. Bern.